

淮海英靈集

八





淮海英靈集

(A)

阮元輯

編主五雲王  
編初成集書靈  
集 靈 英 海 淮  
冊 八

中華民國二十四年十二月初版

輯 者 阮 元

發行人 王 雲 五  
上海河南路

印刷所 商 務 印 書 館  
上海河南路

發行所 商 務 印 書 館  
上海及各埠

鎮

# 淮海英靈集

北湖阮氏詩

烏程陳焯填諱

阮諱世衡

字代公。江都生員。居北湖公道橋。元之曾叔祖也。康熙間以子應武官。封武德將軍。

題黃山六景圖效盧鴻十志體

始信峯

峯高七百九十仞。亭亭獨上。儼如天柱。上有仙石橋。以通南峯磴道。

渺天外兮高峯矗。離絕松雲立於獨。抗灑山軼底柱。屹峯巍峩通玉宇。遊氣高褰始信峯。碧玉簪。青芙蓉。一上七百九十仞。仙橋長兮石磴峻。冥觀萬象投虛刃。

鳴絃泉

源出雲門峯。湍飛千尺。下注琴石。鏗然有聲。

煙嵐碧兮雲濤翠。仙風縹緲琴音邃。望九疑。想九成。鈞天一曲留太清。湍流千尺鳴絃泉。注琴石。聲鏗然。秋煙一碧飛不著。帶長薄兮翔孤鶴。能移我情此澗壑。

鍊丹臺

臺在鍊丹峯頂。曠衍如坪。可容萬人。俯視絕壑。深不可測。

挹元玉兮漱華池。乘風欲與仙人期。迎洪崖。贈瑤草。奇情自寄烟霞表。曠衍如坪鍊丹臺。通顯氣。軼浮埃。丹成九轉巖霞絕。俯絕壑兮不可測。凌虛自有雲霄翼。

天海菴 · 菴常海門峯半 · 每雲氣蒸騰 · 彌滿山谷 · 光燦燦而勢洋洋 · 茲菴全攬其勝 ·

噴煙雲兮積瀕洞 · 海門峯半能虛控 · 瀾黛壑 · 蒸翠微 · 千霞照日開林霏 · 獨擅其奇天海菴 · 振金策 · 老瞿曇 ·

紅翠澄鮮落溟海 · 水潺湲兮石硯礫 · 此中彷彿仙真在 ·

祥符寺 · 寺建紫石峯下 · 唐志 · 滿禪師刹也 · 羣峯聳 · 秀 · 湯泉出焉 · 後望禮道 · 卽入山初徑 ·

紫石峯兮訝挺拔 · 志滿當年留古刹 · 披蕙幌 · 掩雲關 · 珍珠漢出溫湯泉 · 紆迴初入祥符寺 · 香界天 · 金布地 ·

有冥搜者在此中 · 蕩遺慮兮發遊蒙 · 六塵五蓋歸虛空 ·

石筍矸 · 頽水菴右 · 怪石林立 · 自始信 · 峯望之 · 直如兒孫羅列耳 ·

披荒榛兮陟峭嶸 · 矛戟森森天際落 · 苗犢角 · 挺霜鋒 · 衡巫雕刻窺重重 · 兒孫羅列石筍矸 · 金碧潭 · 玉女窗 ·

始信峯前望何遠 · 匪高人兮肯偃蹇 · 萬疊松濤去忘返 ·

阮諱玉堂 · 嘉慶丁巳春 · 吾浙學使 · 閣學士少宗伯 · 阮芸臺先生 · 出其祖招勇將軍行狀 · 及遺稿見示 · 附刊淮海英靈 · 集中 · 祖德克彰 · 誠盛事也 · 按狀云 · 太府君諱玉堂 · 字履庭 · 號琢菴 · 始祖諱嚴 · 當明神宗時 · 由江南 ·

淮安山陽 · 遷揚州江都 · 明末 · 遷居城北四十里湖中公道橋 · 二世祖諱國祥 · 例贈明威將軍 · 高祖諱文廣 · 任榆 · 林衛正兵千戶 · 曾祖諱秉謙 · 以孫諱匡衡公官 · 贈贈武德將軍 · 祖諱樞良 · 晉贈招勇將軍 · 父諱時衡 · 誥封奉政 ·

大夫 · 晉贈招勇將軍 · 凡五世 · 皆有隱德 · 太府君生而偶備有志概 · 長身健臂 · 行止偉岸 · 與中人立 · 頂僅及胸 · 少能挽強馳射 · 矢無虛發 · 尤喜讀書 · 爲古文詞詩歌 · 援筆立就 · 康熙五十年辛卯 · 占籍儀徵 · 鄉試中式武舉 ·

人 · 主試者爲江蘇巡撫 · 儀封張清恪公伯行 · 會劾奏本科文鄉試交通關節事 · 總督反奏 · 解巡撫職 · 遷之揚州館 · 舍 · 太府君於是佩刀挾矢護左右 · 同寢食數月 · 及後奉旨昭雪 · 復巡撫職 · 清恪公極感太府君之義 · 而太府君讀 ·

書勵行 · 一生清介 · 所以深得清恪公教者 · 亦多在此時 · 五十四年乙未 · 武會試中式 · 殿試三甲 · 賜同進士出身 · 分隸藍旗教習 · 五十六年 · 五十七年 · 聖祖仁皇帝駕幸熱河 · 兩次隨扈 · 五十八年 · 授藍翎侍衛 · 雍正元年二月 ·

· 蒙世宗憲皇帝。賞緞三疋。三月。送聖祖仁皇帝梓宮。賞銀四十兩。八月。送太皇太后梓宮。加一級。本年癸卯科。殿試武進士。詔舉技勇。馬箭步箭皆稱旨。賞緞三疋。銀五十兩。十二月。授三等侍衛。賞戴花翎。三年五月。引見。外放湖北撫標中軍遊擊。兵部給都司簽書。管湖北撫標中軍遊擊。兼管左營事。及蒞任。兼署右營。馭士嚴整有律。具爲稱職。五年八月。遭父喪。遵例在任奉諱。服除。十年三月。部議改設撫標中軍遊擊員缺。爲參將。經大將軍岳鍾琪。以軍前才能之員揀補。仍留軍前効力。太府君署理參將印務。十月軍政卓異。十一月六月。引見。奉旨准其卓異。交部照例陞用。欽此。十二年四月。以都司銜陞銜。調補廣東提標後營遊擊。時巡撫德齡。奏請以陞銜仍留湖北。署撫標中軍印務。奉旨著照該撫所請行。欽此。雍正十三年十一月。恭逢恩詔。加一級。乾隆元年正月。兼署右營遊擊。三月。中軍參將到任交卸。旋署興國營參將。七月。始改署苗疆九谿營遊擊。二年。奉旨諭督撫各據所知之人。秉公保舉。湖廣總督史貽直。保舉阮某。才守兼優。奏准紀錄一次注冊。五年五月。湖南城步綏寧兩縣。苗民數萬人。盤踞山谷。接辰州數百里。殺傷官兵。肆出劫掠。道路不通。奉檄領九谿。澧州。洞庭。常德。共四協營官兵。隨鎮軍鎮總兵劉策名。晝夜掩勦。兵駐三界溪。苗悉精銳屯山口。因卽相度地勢。偵探賊情。六月六日。進攻薄賊寨。太府君身先士卒。遠施鎗礮。近接刀矢。斃賊甚多。賊大奔潰。遂乘勝奮殺。焚燒山寨。奪獲糧草器械。三界溪爲賊門戶。故賊屯此爲最勦。自官兵大捷後。賊退保各寨。其勢遂分。提督杜凱報捷。奉硃批。這所奏欣悅覽之。將士奮勇爭先。甚爲可嘉。俟事竣之日。從優議敘。欽此。閏六月四日。攻入樹寨。克之。追殺數里。巢穴焚燬殆盡。七月二十二日。攻長安鹽井口客寨。飛毛坪。龍家溪。竹林各寨。皆次第克之。此五寨地勢險隘。林箐深密。太府君步行率士卒。冒矢石。敗其伏兵。鼓銳力戰。遂於一日中連克之。賊勢已大潰。因駐兵搜捕山箐捕伏。焚燬茅蓬。發獲糧米甚多。是時上慮兵糧未一。命貴州總督張廣泗。駐兩湖。總制全軍。甫到城步。卽察知謀勇最著。奏緞二聯。勞獎極力。南山大箐。屯賊正多。屢攻未克。總督令督各營兵進勦。賊積木石斷山路。兵不能入。太府君日率兵伴攻正道。探知間道。夜率健卒五百人。攀藤越嶺而入。誤墜阮傷膝。流血滿足。以布縛膝。進益力。夜半及正道。徹開木石。是時賊數千人已覺來拒。鳥鎗繩火。紛如亂蟻。太府君命兵負燭偃伏。森牌護前。賊至鎗齊發。我兵寂不動。賊易之。乃鳴一大礮。鼓兵直下如建瓴。賊衆敗散。而正道兵無木石阻。亦大進合勦。殺獲甚多。及曉。搜獲龍魂刀標鎗等器械。及糧草無算。又搜得前被賊殺之巡檢官印一顆。賊餘黨共八百戶。退據南嶺。糧盡不支。間出數十人。近營跪哭乞降。太府君察其誠。爲請於總督。總督云。設賊詐。汝當此告耶。太府君以死任之。次日。率賊衆近總督大營。跪乞降。總督云。發三礮不叫去。乃真降耳。乃對衆發三大礮。斃數十人。餘衆股栗。莫敢。側轉羞感。太府君拯護之恩。故忍死無負如此。總督於是始受降。是時各山賊寨亦並破。老幼退保入橫坡。八月二十二日。奉令領各營兵相機督勦。總督又令遊擊區明李登華。帶兵隨太府君進勦橫坡。山梁險隘。正路不能攻。九月二十八日。率兵由左路山梁奮登。奪殺前進。遂入寨中。鎗礮齊發。賊精銳殆盡。遂大敗。焚燬居室一空。生擒男婦子女。

二千餘人。賊寨盡平。十月初三初四日。復親督各營兵。於橫坡各山箐。四面搜捕。生擒男婦子女千餘人。又獲獲窟室男婦數百人。刀杖銀帛無算。皆親解赴總督所。總督欲盡誅其生口。太府君再四諫阻不從。不得已。乃請曰。壯夫能執兵抗師者。當殺之。其婦女及男子十六歲以下者。必宜赦免。總督始如所請。太府君出營分別男女年歲。苗人環跪。哭聲震山谷。先擇壯年有鬚者斬之。其餘全活。薙髮給以口糧。總督雅知賢能。不深求。仍獎勵有逾諸將。太府君奉令所勦之賊寨。前後十餘戰。皆謀勇並著。兵無少挫。功為諸將最。攻戰稍暇。即賦詩較射以為樂。各寨平後。徵兵回九谿營。總督班第具題。奉旨分別等次。交部議敘。十一年。兵部議敘。頭等軍功加銜一等。隨帶軍功紀錄二次。八月。為苗疆事宜保舉。十三年。推陞河南衛輝營參將。九月。任太府君之在九谿也。訓練勤而兵無虛額。賞重而罰嚴。故湖南勁旅。以九谿為最。城綏之役。有兄弟皆為兵。因母老例泰一人。兄弟爭出。母亦請二人皆從。而自役於署中。其有勇知方如此。及至衛輝。營務廢壞已極。兵貧而惰。弓矢朽折不可用。太府君撤事。限期操練。兵本市中無賴子。素不習武。訛步伐為怪事。十四年十月。相率辭糧罷去。大吏舉劾。奉旨交部議處。部議革職回籍。家無一畝田。蕭然傲居郡城。而湖山寄興。詩酒頗自娛也。十六年。聖駕南巡。跪迎於高旻寺。甫奏名。上在舟中問曰。可是鄂容安所參者。謹對曰是。旋奉旨以都司錄用。以微臣姓名。聖心不忘於數年之後。由此見皇上愛惜人材。神慮周密。纖細不遺。太府君每言之。未嘗不感恩泣下也。十七年四月。補放廣東羅定協都司。二十二年。陞廣東欽州營遊擊。太府君之往嶺南也。以卑瀾故。未奉母周太淑人之任。及至欽州。多受瘴氣病足。夢寐中語多念慈闈。屢欲告養歸。周太淑人諭止之。未果。於二十四年十月十六日。卒於任所。兵民哭之失聲。太府君性剛介。接奉各督撫。尊卑盡禮之外。言語辭色。無少附屈。於僚屬事。多為保全。不以告人。受者久而知感。所至凡鹽權一切陋習。皆裁奏。懷金者不敢造門。太府君未第時。家素裕。備宿衛後將十年。田舍鬻盡。及外遷。愈廉介自矢。家無一日儲。不計也。九谿城北有北山。周數十里。兵民皆仰給此山。有明季指揮家姓之子孫。訟言山本指揮舊地。總督委官勘審。將為所奪矣。乃慨然入省申辨。過洞庭湖。舟覆。賴商船救得出。至省。力言地即家姓地。亦明代事。且絕數萬家之葬望樵蘇芻牧。而以資豪姓為利藪。大不便。總督即違前議。從太府君議。九谿兵民大感悅。偶驕而出。見木石委積。詢知將謀建生祠。太府君立斥撤之。兵民不得已。家祀一主。乾隆四十四年。元父客漢上。遇九谿老兵。為言太府君去後。此祠旋立。歲時祝之不衰。所著有珠湖草堂詩集三卷。琢菴詞一卷。箭譜一卷。陣法二卷。太府君生康熙三十四年。距卒得年六十有五。初授奉政大夫。乾隆元年。晉階招勇將軍。卒後歸自欽州。入城治喪。二十五年。葬於揚州府城北雷塘中壩。以元配汪淑人。繼配江淑人合祔。喜慶元年。以元官誥贈寶政大夫。內閣學士兼禮部侍郎。配並晉贈夫人。按吾阮氏。世以武起家。自元之生獨弱。習馳射力輒不支。父固憐之。命改就經業。暇時為元述太府君平苗之捷。曰。是役也。奇績聞當世。然妣江夫人怛然內傷。寢食不安者十閱月。比事捷。言之猶悻。故予弛騎射不事。今復以命汝。成江夫人志也。元謹志之未敢忘。比元入翰林。充國史館纂修官。檢閱長編。太

府君官儲職績·稍具其略·乾隆乙卯·嘉慶丙辰間·元視學山東浙江·校閱少暇·復以擅庭之調·比次追述·用紀梗概·託立言之君子·圖不朽焉·孫元謹狀·屬吏烏程陳焯·敬承先生命·錄略填諱·

庚戌仲冬偕吳陸瞻登洪山

人影小亭外·蒼茫對夕暉·山明寒月上·樹靜晚風微·斷草迷樵逕·荒烟暗野扉·離愁終莫釋·把酒且休歸·

楊荆山過武昌阻雪留贈和韻

風雪滿江漢·驅寒仗酒力·舉觴勸故人·聊以壯行色·

春殘

不欲春歸去·無如日漸長·雨殘高柳重·風定落花香·寂寞宜詩酒·流連惜景光·遂初何日賦·心事半江鄉·

九日讌同人於見仁亭

佳時重九日·况復是良朋·詩健聯三益·亭高試一登·山空秋葉下·城遠暮煙凝·莫漫輕歸去·茱萸醉未曾·

題靈壽杖

亦名萬壽藤·產於均山·襄陽守尹公見貽·喜其體直而性柔·因題以句·

均山鍾秀似青藜·太守遙貽待我題·精幹正堪膺重遠·他時歸老藉扶攜·

秋夜

秋天暑氣平·秋月夜深明·露浥蓮房冷·風過竹牖清·蛩音近西壁·雁侶卻南征·不寐多振觸·誰知此際情·

江干夕照和韻



楚江流浩渺。夕照下平沙。翠靚山頭樹。光搖水面霞。歸帆明葉葉。羣牧散斜斜。燕坐恣遊日。頻聞噪暮鴉。

秋鶯和韻

既愛春光復愛秋。依然坐柳嘯歌喉。聲聲睨睨撩人思。鼓吹針砭正未休。

荷華

不畏污泥烈日烘。天然品格碧波中。高名豈借濂溪重。香遠原餘君子風。

暮春有感

暮春天氣半陰晴。花落花開是物情。要識榮枯前已定。放開眼界看芸生。

秋夜

臥看天邊銀漢斜。流鶯飄警過隣家。蛩聲唧唧催秋老。碧沼殘荷露泣花。

梧桐

滿院梧桐鏤碧雲。不須洗濯卻塵氛。幾枝曾伴高岡鳳。一葉還封大國君。

秋夕偶成

淒其風雨早秋天。輪轉愁腸攪夜眠。宦海波濤行處有。呼來歡伯與陶然。

次韻袁紹三雨中遣悶

芭蕉滴滴響秋階。及榻連牆長綠苔。赤馭白爲雲掩去。商羊能使雨頻來。宦情淡處同花妥。詩思清時勝  
霽開。愛我同袍善排遣。未曾棖觸笛聲哀。

書懷

勛業如何得大還。順時知命歷諸艱。放懷且飲花前酒。極目常看月下山。孰謂遽尋高士樂。算來終讓老  
僧閒。龍鍾四十勞生半。陳迹興懷俛仰間。

八月庭梅忽放一枝

金風忽破一枝梅。香滿庭階蝶夢猜。瘦影應隨寒月淨。孤芳何逐素秋來。若辭白雪難爲友。或愛黃華故  
作媒。折寄隴頭人不信。沈寥天氣一銜杯。

次韻月下菊影

耐霜宜雨更宜晴。瘦影迷離月底生。翠葉頓將濃墨潑。黃花偏就淡烟橫。天流冰魄同消長。雲罨秋宵作  
暗明。壁上橫斜闌外轉。只愁催曉漏聲聲。

九日

敢效龍山作勝遊。佳時散步一凝眸。佩萸囊小千家冷。落帽風高萬里秋。酒點菊花香泛泛。歌遲雲影碧  
悠悠。半弦月向當頭照。欲去高亭爲小留。

江行夕眺

舟行三十里。不覺夕陽斜。上下依橋燕。參差夾岸花。遠村藏酒市。深火出漁家。唱晚中流急。聲聲雜暮笳。

壬子仲冬入京途中作

驅車八九月。已過十餘城。風勁憐裘敝。霜嚴覺酒輕。寒沙驚馬色。古木動烏聲。不畏征途永。心懸帝闕旌。

過岳鄂王湯陰故里

武穆精忠亘古稀。丹心日月共光輝。獄成三字千秋恨。多少英雄淚濕衣。

春日道中

歸從京國駕征車。非復嚴冬風雪加。嫩綠長隄雙岸柳。新紅小院幾枝花。鶯聲恰恰流歌桁。燕語深深滯酒家。如許春光泥人處。頓忘行役在天涯。

桐雀臺

魏武雄心著鄴城。高臺華侈幾經營。當年勝跡今何有。惟見漳流照舊清。

盧生廟

仙佛無非夢。盧生覺豈真。邯鄲來往者。俱作夢中人。

贈別張洪範協鎮

奕世簪裾孰與爭。早從邗上飲香名。常年積勸關西堡。近日旌移冀北營。叔子風流真可羨。燕然銘勒豈難成。臨江釀酒無他祝。疊被綸言慰梓情。

秋風吟

亭皋木葉起秋聲。紅蓼初殘蘸水清。對此蕭條江路永。感人最是故園情。

舟泊黃州

解纜朝辭黃鶴樓。下春帆影落黃州。橫江白露銜山月。何以蘇公赤壁遊。

登興國廡後容膝亭

城上烟雲淨。湖中葭菼寬。我來切憑眺。容膝易爲安。

富川攝篆

野路山城僻。門臨古富川。周遭雲接嶺。屈曲水通船。民朴勤農事。官清乏酒錢。莫言從薄宦。此處好林泉。  
不寐

冷暑無人月轉明。早聽八百寺鐘聲。欲眠窗外來斜影。高枕無端夢不成。

滄浪烟雨

一派滄波直接城。虛亭四面碧涵清。烟迷楊柳千重色。雨打芙蓉萬點聲。詩句都從遊興就。酒卮常爲放

懷傾。昔年孺子還同調。不覺行歌濯我纓。

仙觀晴霞

晴空霞氣繞仙壇。雞犬猶傳覺舐丹。道士自通元妙訣。故留餘綺護欄杆。

初莅九谿。寄和袁紹三韻。

十年都會裏。近日萬山中。要地雖新易。深山與舊同。宦隨溪水淡。心與嶺雲空。踈嬾宜幽僻。差安淳朴風。

次韻劉茲受雨後對月

獨愛初秋夜。炎威雨後平。竹梢移月影。蕉葉弄風聲。遠岫當軒淨。長溪入耳清。十年羈鄂渚。到此遂幽情。

秋夜

步履徐徐度小廊。秋深竹塢過來涼。山中月色明如晝。清氣疑時草木香。

秋月

怪爾天邊月。當秋愴我神。北湖千里遠。南楚一官貧。廢堞綠山谷。邊陲雜獠民。公私籌靜夜。草覺側冰輪。

賦得冷露無聲濕桂華

冷露無聲濕桂花。一庭清蔭傍窻紗。濃香聚處更方永。麗色明時月正華。已向廣寒餐玉液。不須絳樹到仙家。夢回觸鼻真無隱。黃雪還看射曉霞。

中秋

三秋已過半。桂魄此宵圓。可愛冰壺澈。何須樺燭然。攀花作清供。把酒續殘篇。永夕山城看。身親玉宇前。

秋夜回文

夜月歸舟晚。蛩鳴落葉飛。樹高來氣爽。林密透風微。

自識

窮通得喪孰先知。自識升沈各有時。夙昔雄心消殆盡。而今宦境淡于詩。

題仙侶洞

無處覓丹臺。嶙峋一穴開。乘龍何日去。跨鶴幾時迴。紫府溪山曲。元都索水隈。吾儕寧絕粒。也得暫徘徊。

次韻袁紹三九日風雨

重陽傳令節。風雨冷清清。但覺黃花瘦。誰知紫蟹橫。林疎迷嶺路。灘急壯濤聲。舉目悲秋老。難忘故土情。

軍營和田人二真詩韻

松亭愁溽暑。溪月喜新涼。妙語仙凡別。焉能較短長。

次韻韋總戎軍營感懷

邊徼身經第一秋。西風鼓角幾時休。山間壁壘連雲築。林外旌旗帶雨收。但覺此生心坦白。終須元老樹

謀猷請君試看軍行際。頃刻安危動我愁。

秋日軍營寄韋總戎袁紹三。

風風雨雨苦無休。欲使征夫白盡頭。但使北堂慈竹好。平安之外復何求。

橫坡紀勝

橫坡負固幾多年。劫殺頻頻不畏天。今日王師彰捷伐。魚遊釜底少生全。

軍營雜感

瘴雨連綿澗水潺。星羅行帳駐崇山。但期醜類歸王化。誰計艱辛幾月間。

苦雨淒風那不聞。寒威漸逼尙行軍。病軀黽勉猶從事。不到平蠻不策勳。

次韻薛協鎮軍務告竣雪霽對月

積雪千岩與萬巒。月光暎射白成團。談深清夜都忘倦。飲傍紅爐不畏寒。故壘重重閒秣馬。軍聲寂寂靜

聞灘。穹廬一碧明如晝。淨掃蠻烟黎庶安。

次韻薛協鎮凱旋偕行

雪消雲淨喜班師。策馬偕行笑語時。戎務一心勤到底。世情滿眼任如絲。繇來解釋依紅友。興到吟哦愛

白詩。邊境廓清民復業。往來八月未爲遲。

和韋總戎軍營寫懷二首

觸蠻聯楚粵。天討壯三軍。恍似西風起。驅除萬里雲。  
轉戰懸軍入。身先矢石中。但能無喪失。不欲尙奇功。

師還

師行紆八月。十戰楚南陲。勝負何能料。安危不可知。  
皇威能遠屆。臣職盡當爲。每到艱虞處。吁嗟繫我思。

庚申除夕

南楚歸來日。青陽逼歲時。一杯除夕酒。奠爾死綏知。

春雨

彼穠桃李雨爲讎。待到晴時花已休。對物言情人亦病。豈緣賦命本窮愁。

早蛩

唧唧蛩吟入夏時。羽書旁午便神馳。可堪不寐閒牕下。聽爾頻添酒數卮。

次韻溪城觀漲

積雨連朝夜。千山水匯川。奔騰欲浮樹。泛濫遂侵田。舟疾金梭擲。灘平雪浪旋。沙鷗偏泛泛。徙倚戍樓邊。



和醉翁韻二首

吾亦杖頭挂百錢。陶然常向酒家眠。那堪吏部常翻壺。無那翰林不上船。清俸何堪乞酒錢。閒來消遣對愁眠。好將歲月催三雅。莫計他年屋住船。

醉仙二首

茅屋蕭疎八九椽。依山傍水合天然。琴書以外無長物。鶴髮童顏一醉仙。山深水曲翳雲烟。長買風光不用錢。此老胸中涵萬有。莫教錯認酒中仙。

端午

角黍爭嘗日午。龍舟競渡天中。世上徒娛兒女。古來誰哭英雄。

題九谿麻壁

官閒緣地僻。不似武昌時。角勝三杯酒。淡兵一局棋。軍民喜和輯。升斗望經持。更有開顏處。香山長慶詩。

次溪晚韻

政簡饒清興。溪平類落潮。汀煙籠翠竹。珠露上青苗。把卷南榮暗。銜杯北海招。山城無限趣。峯疊水源遙。

晚興

寂寂溪城亦在公。公餘午後覺心空。踈狂酒興聯吟裏。斷續碁聲落照中。老樹嵐披殘靄碧。歸禽影帶斷

霞紅。虛名原不關輕重。憂喜無勞問塞翁。

辛酉六月黔苗蕩平志喜

炎暑正流行。黔苗喜蕩平。中庭堪露坐。邊地憶長征。筆陣還酣戰。碁枰尙苦爭。何如從小吏。不必借千城。

喜雨

雲羃山腰折。風吹雨脚旋。赤曦藏隱霧。黑輦起淵泉。因野甘霖遍。千倉富有偏。晚涼開霽後。深樹聽鳴蟬。

秋意迴文

森森翠竹弄清風。鬱鬱蒼松繞碧空。林蔭生涼微退暑。岑雲絢綵耀飛虹。

舟行

百丈遙牽破石尤。水天同色望中收。此行縱不思鱸膾。卻載江湖一片秋。

泛洞庭湖

洞庭湖水接天流。極目蒼茫萬頃秋。曉日波光紅泛泛。暮雲山色碧悠悠。風濤自信依神力。書劍從來與古謀。承乏九谿剛六載。凌波五次盪輕舟。

暮春積雨

雲壓山嵐瘦。烟疑水氣重。亭陰疑晝掩。柳暗似塵封。不覺春情淡。還餘客思濃。過多妨穡事。每遣問三農。

仙侶洞

洞府丹成不記年。至今勝跡著山川。紫駝高聳千峯仰。白馬飛流一派懸。靈秘深藏金簡底。清虛恍在玉宸前。道人久住渾相忘。可識仇池小有天。

玉皇閣

玉皇高閣峙山巔。呼吸遙通帝座前。未許羽流分法界。卻教花雨散諸天。舟行斷續長林下。飛鳥差池疊嶂邊。我與閭黎雖異轍。六如參透總超然。

黃鶴樓

鄂渚聳仙樓。奇觀一望收。八窗接雲影。萬派匯江流。崔顥詩稱絕。禰衡怨未休。梅花銷玉笛。黃鶴付悠悠。粵行雜憶八首。附家書後。

邗上迎鑾領玉音。棄瑕感切小臣心。嶺南紆路三千里。敢畏長途暑氣侵。數載鄉園久奉親。馳驅又作出山人。承歡菽水時依戀。迎養爲難未得陳。瑟好琴耽得未曾。高堂留奉理相應。秋風如舊分南北。切莫深閨別怨增。家庭原樂敘天倫。今此長征祇一人。薄宦天涯休念我。但勤生計不憂貧。淑質柔姿誨愛同。肅雝和順理須窮。幼年汝輩常依父。今日都歸遙憶中。

既爲子婦比吾兒。相勗相親總不私。寒素家風宜習慣。女工贊助不容辭。  
任勞任怨總安貧。小婦常惟大婦遵。實命不猶知自愛。他時未必不如人。  
崢嶸頭角是孫兒。記誦惟勤正此時。他日成名慰我意。庶幾春上萬年枝。

### 遊百花洲

百花洲上百花芳。亭繞澄湖樹繞廊。三十年來成一夢。祇今又復過南昌。

### 登滕王閣

登臨高閣動商風。南浦西山望不窮。物換星移增感慨。惟推一序子安工。

### 張家渡謁文丞相祠

丞相留名有幾人。巍巍信國獨成仁。張家渡口荒祠在。一片丹心照水濱。

### 題河頭麻壁二首

恩鑒中州移粵東。頭銜雖別意冲融。地連四郡山層疊。風物九谿大略同。  
嶺南畢竟勝天中。氣肅秋高勁角弓。精力漸加因較藝。相規理法悉能通。

### 阮琴堂

字鶴隨。號邁湖。儒徵生員。元之叔祖也。子承旻。承孟。

冬至月杪友人招集觀素心黃梅分體得雪字。

三九初交風凜冽。獨有黃梅傲冰雪。主人愛客兼愛花。紙圍圍爐盛陳設。呼童揀取繁枝折。插向膽瓶同玩閱。我起浩歌坡老詩。玉藥檀心兩奇絕。東君蠟丸信暗拆。返魂差勝龍涎熱。不須問法老瞿曇。誦宣香味廣長舌。雅懷原與素交結。掇取含苞共茶啜。辛邊帶苦最清奇。獨憶廣平心似鐵。

阮諱金堂

字宣廷。號懷州。又號容聲。儀徵增廣生員。元之從叔祖也。子承春鴻俱生員。

### 鑿冰行

臂發栗烈風號空。長河之水成晶宮。千艘阻絕行不得。奮呼開鑿聲沖沖。舟行銜尾波蕩瀟。羊角稍弱羊腸通。大凌觸舷劇犖确。小凌琢擄驚琤琮。彼招招者慮舟碎。側目但作愁胡容。是時白日當高春。亟行不可徐行從。攀躋尺寸頗艱澀。紛紜篙楫爭豪雄。邛溝漕渠三百里。但看經過無留蹤。所賴來舟亦努力。欲行之心無不同。戒爾舟子勿少懈。方鑿又凍尤難攻。

### 春感

餘寒仍薄暮。春絕判東君。花落無人夜。湖空何處雲。幻緣參小劫。幽感託微醺。問訊梁間燕。芳菲剩幾分。

阮諱承裕

字衣谷。號問夫。又號溶江。儀徵廩生。乾隆壬辰歲貢。元之從世父也。子嗣興。

### 爲友人題照

春雲駐曉山。春雨發華木。窈窕石蘿深。藹然見茅屋。牕翠冷古松。籬烟澹修竹。花氣吹午香。苔色坐晴綠。

襟涼一樹風。琴響雙岩瀑。溪影淨鳶鳧。林烹耿麋鹿。吟嘯寄長霞。須眉鏡新淥。揮手謝塵坱。素駕詎云俗。  
阮諱承德。字純一。號健齋。元之世父也。以子兆麟官贈奮武郎。公晚年放于詩酒。所著稿隨手散失。今輯錄得六首。

### 題山水畫冊

一片晴嵐照眼明。溪光樹色冶春生。筆端蘊藉傳天趣。知向山陰道上行。  
深柳書堂面面風。曉霞低蘸藕花紅。何人盪槳來烟浦。十里清光玉鏡中。  
山疊林迴徑路窮。蓼花夾岸小橋通。人家隱隱炊烟淡。應有村雞啼午中。  
清霜一夜樹深黃。孤艇乘秋到草堂。雅有東籬千本菊。小橋流水亦生香。  
幽居不厭亂山深。報道秋來霜入林。小住情怡青澗裏。長歌聲透碧松陰。  
邱壑經營著意新。宜秋宜夏更宜春。若教飛雪冬來滿。步履尋幽有可人。

### 歙江氏詩

甘泉林慰曾填諱

江諱承玠

字摺五。號拙菴。父諱演。由歙遷揚州。公其次子也。官浙江台州知府。調嘉興。陞兩浙江南鹽驛道。多惠政。愛民教士。天台齊次風侍郎。爲公所識拔。故侍郎終身執弟子禮甚篤。

### 東闕門觀荷

清標偏出自泥中。淨植亭亭御苑東。檀粉一莖勻淡白。絳綃千疊簇深紅。粧凝明鏡澄秋水。人過平池儼  
蕙叢。攜得爐煙滿襟袖。芰荷香裏共吟風。

暖香紅霧不教歸。碧玉池頭入望微。十丈華峯安可卽。一枝禁闥自相依。凌波不鬪朱顏麗。太液應羞解語肥。向晚涼颼吹雨過。翠盤擎出盡珠璣。

江諱

字著舒·號芝亭·元祖妣江夫人同胞兄也·本籍歙縣·祖演·父瑜·儒居揚州·遂入籍爲泰州生員·性耽經史·留心世務·康熙間以例授刑部督捕司郎中·兼三司事·案牘明敏·諸曹倚重·俸滿·授甘肅臨洮府知府·調西寧·解驩匹軍營悞期·發屯田効力·乾隆初·奉旨送部引見·授宣化府同知·嗣以終養告歸·子一·振箕·候選州同知·

西寧道中

日落西風怒馬嘶。愁看甲士臥牛犀。軍儲豈敢疎俄頃。劍橐何堪倦挈提。塞草驚沙圍暮帳。陣雲熱火響寒聲。鄉心到此俱成燼。休說艱難運不齊。

偕家麗田遊黃山

嵯峩山勢當空矗。拾級而登途起伏。循沿躡足相徘徊。九道飛泉浴心目。須臾直上步雲亭。亭前苔蘚多青青。靈錫音收香雨散。桺檀龕覆鑪煙冥。其間石隙藏禪室。木蓮花下頻延客。冷然鐺響煮新茶。環觀荆杉如列戟。嵐光離合無定容。神霧凸凹緣崖封。石獅踞地忽欲吼。松濤萬派噴蛟龍。穹天低蓋地接軫。混沌一氣噓萬蜃。雲霞瀰漫詫奇觀。幻海浮瀾豈兆朕。從此緣登一棧天。絕頂明月嘯哀猿。猿聲未住客歸去。數峯月色徒娟然。

江諱

字于升·號容齋·芝亭公同胞弟也·江都學生員·能詩善奕·一時國手·如范西屏·施定菴輩·皆久館齋中·海內奕者雲集·

盧雅雨招往篠園看桂。時往深莊未預。卽次原韻。

露涼風靜桂花秋。聊趁公餘作勝遊。屏列東西香滿座。樹迎賓主翠侵眸。鸞坡鳳閣沾新雨。酒盞詩瓢釋舊愁。未得摳衣隨杖履。荷鋤辛苦恨江頭。

江諱春。元撰傳云。公諱春。字穎長。生時有白鶴之祥。故號鶴亭。姓江氏。徽州歙縣人。祖演。僑居揚州。父承瑜。

大史步青弟子。善屬文。工詩。與程編修夢星齊名。補邑學生員。以五經應試未第。遂出其才。治禮業。爲金壇王其能。檄爲總商。凡重事皆與擘畫。乾隆十六年。上巡幸江浙。揚州迎駕典禮。距聖祖時已遠。無故贖可稽。公擬立章程。營繕供張。纖細畢舉。二十二年。南巡。駐蹕金山。召對稱旨。覲解賜金絲荷包。授內務府奉宸苑卿。三十年南巡。修治紅橋東之淨香園。蒙御書怡性堂額。賜福字金玉如意。城東南高阜曰康山。相傳爲明康海讀書處。公葺新之。四十五年。四十九年。南巡。上喜平山之外。得近處小憩。遂再幸其地。賜額賜詩。公理嵯務。四十一年中。凡祇候南巡者六。祝皇太后萬壽者三。迎駕天津山左者二。最後入京赴千叟宴。國家有大典禮。及工程災賑兵餉捐輸。上官凡有所籌畫。惟公是詢。公才裕識超。專心國事。不顧私計。指顧集事。又更事久。強記善用人。苟有益于各省轉運者。知無不爲。規遠利而不急近效。周急濟貧。加意于書院。養老院。育嬰堂諸事。務本堂給資月銀。有增無減。每發一言畫一策。羣商拱手稱諾而已。羣商之受指揮不便其私者。或退有怨言。然而兩淮提引案發。速治羣商。首總黃源德。老疾不能言。餘皆自危于斧鑕。公毅然請當其事。廷獻時。惟叩頭引罪。絕無牽引。上知公無私。罪官而不及商。所保全兩淮之人甚衆。太監張鳳。以銷毀金冊。捕逃頗急。風至揚州。公。公子杯酒間縛之。上飭封疆大吏之失察者。特授公布政使司。上深知公誠。蓋有長才。每見之。輒加詢問。公贊無私著。辦公力絀。上賞借帑金三十萬兩。公運鹽之號曰廣遠。每嵯使者出都。必諭曰。江廣遠人老成。可與商辦。前後被賜御書扁字。貂緞。荷包。數珠。鼻烟壺。玉器。藏香。拄杖。便蓄不可勝紀。如錢司寇陳軍。曹學士夫。公偉岸豐頤。美須髯。喜吟詠。好藏書。廣結納。主持淮南風雅。北郊鐵佛寺。荒寒多紅葉。公數招杭太史世駿。諸詩岸。清齋賦詩終日。蘇文忠公生朝。與諸詩人懸像寒香館賦詩。一時文人學士。如錢司寇陳軍。曹學士仁。江。雲編修士銓。金壽門農。方南塘貞朝。陳授衣章。陳玉几撰。鄭板橋雙。黃北垞裕。戴東原寬。沈學士大成。虎。蕪編修士銓。吳橋亭煥。金樓亭兆燕。或結綰紵。或致館餐。虛懷卑節。人樂與遊。過客寓賢。皆見優禮。與玲瓏山館馬氏相埒。所著有黃海游錄一卷。隨月讀書樓詩集數卷。公感國恩。竭力圖報。治公事。戴星出入。暇卽從事詩酒。不自持籌算私積。言事投書者。數十輩林立。隨方應付。食頃已畢。或曲劇三四部。同日分亭館燕客。



·客至以百數許·恆以長物付質庫·分給數庖應之·公以乾隆五十四年·積勞致疾卒·年六十九·卒之日·家無餘財·賜帑未繼·鸞產及金玉翫好以足數·公無子·以弟昉次子振鴻爲嗣·上知其卒後貧·復賜帑諭振鴻業·以繼其父·振鴻弱冠能文·勤謹儉約·力圖起其家·不敢貢上垂念舊商之恩也·

三月十三日從江村結伴作黃山遊爲風雨所阻

昨日望羣山今晨山不見峯巒雨腳垂溪流雨聲變似欲秘靈奇煙雲斂顧眄惆悵理行色徘徊生繾眷如何邁往心隔夕徒空羨

朝曦初暄晴山在望乘筇輿取道豐口過許村午後冒雨行數里抵徑嶺止宿

昨朝方戒途雨阻欲無路今晨思啓行開門滿晴煦雨若拒客來晴若招客赴山靈本無心招拒詎有故兀兀筇輿中漸與賞心遇但愛前山雲飄然媚輕素

天紳亭

天紳亭對九道泉飛空直下青山巔銀河奮出爭倒挂鱗鬚鼓動聲雷填之而攫挈衆山卻跳珠濺玉聞鏘然安能身置苦竹間仰面落雪水底眠酒酣遊作五里霧乘風嘯雨空中旋

靈錫泉

東國神僧蹟溪傳靈錫泉緣塔蒼蘚滑掃石翠雲鮮香雨諸天洒栴林一道穿清風發幽籟心賞自冷然

雲谷

領妙如悟禪。搜秘等居讎。看山得是法。善刀無全牛。予雖乏濟勝。足與耳目謀。諸峯悉橫陳。錯采紛雜投。一一可指數。其名均可求。惟有雲外峰。虛無渺難收。徘徊復顧眺。日落尙夷猶。

### 九龍菴

靜通一徑遡高岑。蒼翠重重覆遠陰。僧爲精修營小構。客於佳勝費幽尋。拈來塵尾心殊契。放下茶杯味特深。乞得木蓮花數本。他時小墅蔚成林。

### 接引菴

侵曉試攀躋。幽尋意已迷。松身橫跨谷。嶺路直乘梯。橋信仙人渡。身看鳥翼低。如何纔一瞬。大海白雲齊。

### 雲海

曉登始信峰。俯視衆峰如立錐。直下百千仞。四面攢集同積蘇。白雲縷縷忽焉起。空中變化千萬殊。有若金鼓賊萬馬。奔騰排軋爭危塗。又若曲江潮。飛山卷雪廻狂飈。白地倒海忽平鋪。三十六峰遭吞屠。雲帆煙柁雖不見。點點浮髻時有無。虛吸太虛入縹緲。俯仰色界難畫圖。平生奇觀詫第一。物外供我神靈娛。一笑塵中局縮轅下駒。曷不求爲造化徒。垣規瓦壓胡爲乎。

### 擾龍松

帝松久已謝泥塗。雪甲冰鱗瘦不枯。一夜雷聲塵夢破。四山風雨起龍雛。

天都峰

中天翠色豁然開。高削瓊峰插斗隈。呼吸九霄通帝闕。噴吭萬笏擁仙臺。煙光海上浮三島。雲氣巖前聚八垓。何必崆峒遠相訪。定知鸞馭有時來。

慈光寺

初日開重陰。清暉散羣阜。雨餘寒氣束。林樹紛雜蹂。散懷上香臺。依回佇延久。前峰若解籀。離立盡崑嶽。蕭蕭氣體淨。獨立空諸有。偶憶先人言。長吟一回首。

湯泉

碧甃圍成沼。硃砂涌作池。溫其如玉處。清可濯纓時。淡日桃花色。輕漣硯子絲。青州有紅硯。硯煩襟爲一滌。快若好風披。

庚辰夏水南花墅復開並蒂芍藥十三枝雅雨盧公重過譙賞卽事賦呈

昨歲奇葩獻一枝。紅廳綠酒正酣時。今年花墅重呈瑞。博得瑤華七字詩。揚州遍地是樓臺。藥圃重重亦並開。一朵雙花隨意數。剛從二十四橋來。小墅競花傍水南。駢枝通放十餘三。明年春色還應倍。預向韓公宴上探。

宿玉峰菴

此地曾三宿，迂迴逕可尋。山風吹落葉，高樹靜鳴禽。偶爾聞清楚，因之生道心。披衣還起坐，幽興付長吟。

登觀音崖次韻

有級堪登卽坦途，俯窺斜照映金鋪。千尋雪浪東歸海，一帶紅旂半入吳。鷹趁風嚴雙眼疾，天因秋老片雲無。振衣欲下重延佇，月色紛紛滿荻蘆。

新月

三四稱佳夕，清暉自昔聞。今看新月早，已覺夜光分。無力穿疎幔，如鉤隱暮雲。卻憐牆角上，花影欲紛紛。

三兄齋中木蓮初放烹惠泉淪龍井茶招賞分賦

黃海滋奇葩，天教老巖壑。阿兄稱好事，移來廣陵郭。今年四月中，花開頗綽約。旱地栽芙蓉，高枝綴芍藥。賦質雖略同，敷色均不若。綺席招羣英，華燈交錯落。泉取惠山清，茗將龍井淪。雅坐絕喧囂，詩成方命酌。既對故鄉花，復敍天倫樂。花亦解人性，雲霞擁聯萼。

初秋自新安抵廣陵與諸君子談里門山水之勝

緬昔丁卯春，曾攬黃海勝。及茲十七載，欲往期莫定。得歸自初夏，尋源泝舊境。練水游空如，水經注：魚飛山名。露花覆汀洲。風泉鳴石磴，朝嵐景光幻。遙岑奇秀孕，佛宇霞擁城。村炊雲出飯，惆悵迴輕橈。魂夢戀清磬，榻來值新秋。涼颼動遐興，羣彥羅西堂。芳樽佐盤飮，歷數山水佳。四座無倦聽，諸君當

臥游。予言可取證。

淨香園卽事

重重深柳罨亭臺。五月池荷尙未開。高潑浪花舟競渡。繡旗低捲綠雲來。揚鬢奮鬣去逶迤。鉦鼓聲喧勢疾馳。蹙踏波心身手捷。萬人爭看奪標時。

竹西秋望

寺外孤亭聳鬱盤。每來高處總開顏。憑欄縱目斜陽裏。秋在江南一帶山。

秋夜吳魯齋使君暨汪秀峯陳對鷗金棕亭沈學子汪石恬集飲小齋卽以使君所遺韻笥分賦得屑韻。

使君中湖來。秋風片軫警。遺我平水韻。四聲森以列。散爲百七籤。粲然衆星揭。貯之青瑤笥。摩挲竹光潔。埽逕迎嘉賓。壺觴次第設。忘形脫冠巾。譚藝濯冰雪。拈韻類藏鉤。健筆鍊屈鐵。門奇出險仄。論工在穩切。得句人皆驚。含意味不竭。吳侯掣海鯨。羣公罪玉屑。慙予昧音讀。急緩苦難別。高誘注。淮南子有急氣緩氣讀。卽擊韻反切之始。 藏寶篋笥。韻奉作圭臬。哦詩博衆護。擊亂寒蟬咽。

輓馬半查

少微入夜落銀河。把卷無人詠澗阿。前輩餘君今又喪。西州掩淚忍重過。等身著作傳江左。當代辭徵讓

大科。地下還應續風雅。廣陵詩客似麻多。

江諱

元作傳云。公諱昉。字旭東。號橙里。又號硯農。鶴亭公同祖弟也。父諱承玠。以戶部郎中。歷知浙江嘉興

台州府事。陞浙江鹽驛道。誥授中讀大夫。清介多惠政。母宋淑人。早卒。筵室萬淑人。實出公。三年而歿。筵室劉淑人。教育如己出。觀察命公事之為慈母。劉淑人之歿也。公哀毀行斬衰三年喪。請封于朝。不知禮者或議之。按儀禮喪服經傳曰。慈母如母。死則三年如母。貴父之命也。國朝定制。慈母如母。斬衰三年。謂所生母死。父令別妾撫育者。吾固曰公知禮制。公之孝也。公性恬靜。幼承觀察清白之訓。內被淑人折翼之教。遠絕靡麗。惟以詩書自娛。所著晴綺軒詩。意境清遠。得宋人高格。尤慕姜白石。張叔夏之風。為晴綺軒詞。清空蘊藉。無繁麗弱衰之情。除激昂器號之習。可謂卓然大家者矣。又嘗集宋人七言詞句。為絕句詩。妙思清響。如出己手。所居紫玲閣。名士之至揚州者。無不解履。與化任進士成誓。公之師也。任公子侍御大椿。以經術品行為公友。天台齊侍郎召南。為諸生鼓篋數文書院。觀察遇之極厚。為觀察門人。與公亦以學相長。錢塘厲太鴻。嘉興王穀原。又曾。暨鶴亭公。諸賓客多主公家。湖舫山輿。聯吟限句。殆無虛日。一時文謙之盛。稱二江公家。公狀端凝。性仁厚。周急無繆色。詩人方介亭和。嘗被陷。公委曲用心。以厚賞免之。汪雪礪。貧不能出戶。公濟以服食。共吟詠。薦于鶴亭公。如此類者不勝紀。鹽筴最稱湖北。領之者立致巨富。然積弊難釐。鶴亭公俾公領之。數年歸。囊無餘貲。至鷺田宅以償遺。晚年尤耽山水。有別業在蘇州太湖西嶺山。曰西嶺山房。嘗扁舟為梅花往。筆床茶壺。得天隨之趣。乾隆五十八年卒。年六十七。候選知府。誥授通議大夫。子一。振鷺。鹽運同知銜。能詩工書。

晴綺軒集詞句

選二十九首。公自序云。春來佳興。每感徐陵。秋到幽懷。都傷宋玉。落花可惜。題詠無子京兄弟之才。垂柳堪憐。酬唱乏樂天情。董之勝。因藉現在孤裘。運以自家賦綫。舞燈匿影。靜翻

琴趣諸篇。微韻選聲。祇摘樂章七字。寫景則裁紅韋碧。按語則換羽移宮。綠陰青子。終歸雲散風流。白露黃花。又見霜明月皎。聽萬家之砧杵。聚四壁之蓬聲。此際含毫。還替閨人寫怨。一時伸紙。盡為客子填愁。半律吟成。雙鬢教唱。酒邊花外。電尋唐宋之音。小令長謠。略觀元明之句。詎同鐘楛。偶學剪綃。時在己卯小春自識。

東風料峭雨難晴。陣陣飛花惹恨生。幾度問春春不語。亂飄鴛瓦細無聲。

周炎

無名氏

悄倚西樓第幾闌。六銖衣薄惹輕寒。金徽昨夜初廣月。折得梅花獨自看。

周密

潘昉

堤上毵毵柳色明。草香沙暖水雲晴。江南二月春深淺。初聽黃鸝第一聲。

吳子孝  
吳元可

落英點點拂闌干。瘦影難敲月墮看。一曲銀鈎簾半捲。小樓吹徹玉笙寒。

謝逸  
劉翰

夕陽低映小窗明。寂寂閑庭雨乍晴。春思半和芳草嫩。新愁還入賣花聲。

毛文錫  
和凝

殘花微雨隔青樓。聽得吹簫憶舊遊。不分小庭芳草綠。一春長是為春愁。

顧夔  
張元幹

暗折雙花惜小春。一簾疎雨細於塵。舞衫寬盡不堪著。鏡裏青鸞瘦玉人。

張先  
石孝友

樓倚江邊百尺高。垂楊慢舞綠絲條。柔腸一寸愁千縷。安得并州快剪刀。

張先  
李清照

抱雲勾雪近燈看。風韻蕭疎玉一團。蜜炬垂花知夜久。錦屏羅幙護春寒。

張先  
賀鑄

暗飄龍麝錦幃傍。金鴨猶殘昨夜香。鬆髻欹雲慵不整。凭闌心事隔垂楊。

顧去華  
袁去華

翠袖風前冷不禁。綠楊庭戶靜沉沉。新聲懶奏移纖玉。閑卻梅花一曲琴。

張炎  
李煜

絲絲楊柳絲絲雨。一夜東風一夜深。寒食清明春欲破。重簾雙燕語沈沈。

蔣捷  
晏殊

絲絲楊柳弄輕柔。祇在溪南罨畫樓。細草平沙花夾道。一程煙水一程愁。

王雱  
馮鼎位

碧落仙人著句清。小詞流入管絃聲。畫堂宮徵生離別。雲為歌新不忍行。

侯真  
蘇軾

夕陽影裏記徘徊。玉砌紅芳點綠苔。簾外櫻桃花半謝。一庭春色惱人來。

楊慎  
歐陽炯

一灣柳護水房春。芳草留香燕語新。滿架薔薇花欲謝。日高深院靜無人。

張炎  
唐世瀚

趙可得

葉夢得

陳三聘

李璟

唐世瀚

江開

孫惟信

辛棄疾

王同祖

張可久

歐陽修

汪元量

周文璞

歐陽修

呂渭老

吳文英

徐照

汪元量

宋妓朱秋娘

韓偓

辛棄疾

史達祖

晏殊

無名氏

無名氏

魏承班

明媛沈宜修

晏殊

碧紗如霧隔香奩。風遞薰絲出繡簾。祇有輕寒渾不定。落花微雨恨相兼。  
 簾幙輕廻舞燕風。雲屏冷落畫堂空。最愁人是黃昏近。一樹梨花細雨中。  
 藕絲衫袖鬱金香。花柳分春各自芳。二十五絃彈未盡。玉簫一曲杜韋娘。  
 玉閨深掩過年華。簾月樓空燕子家。又是闌珊春色暮。風廻香雪到梨花。  
 又攜書劍路茫茫。祇爲林泉底事忙。二月東風催柳信。踏花歸去馬蹄香。  
 小小紅船西復東。淡黃衫耐藕絲風。廻塘深處遙相見。奴隔荷花路不通。  
 月華猶在小池東。涼滿庭心夜色空。梧葉窗深調玉軫。素絃一一起秋風。  
 月高霜白水連天。有意沙鷗伴我眠。江上曉風三四點。採蓮人語隔秋煙。  
 清簾踈簾一局棋。已涼天氣未寒時。玉鉤闌外香堦畔。長笛誰教月下吹。  
 素雲凝淡月嬋娟。不管人愁獨自圓。霜冷闌干天似水。數行新雁貼寒煙。  
 碧雲冉冉蘅皋暮。斷續寒砧斷續風。鴻羽難憑芳信短。水村殘葉舞愁紅。  
 萬般惆悵向誰論。百尺樓高空斷魂。寒雁一聲人正遠。娟娟霜月冷侵門。  
 十年香夢老江湖。一斛明珠換綠珠。舊日愛花心未了。相逢還解有情無。

江諱 振箕 字元縉。號星嘯。芝亭公子。候選州同知。元之妻父也。工書能詩。性愛雅潔。筆視几席。無不精良。臨帖繙書。罕接塵俗。子寅。

賀楊慎 盧祖昇 張炎 晏幾道 歐陽炯 柳永 辛棄疾 晏殊 宋宮人袁正真 李彭老 吳文英 宋高宗 王懋 謝懋 晏幾道 辛棄疾 晏殊 馬延己 柳永 李甲 程垓 蘇軾 晏幾道 馮驥位 孫光憲 馬延己 陳克 無名氏 舒亶 王子可 韓滉 全上 宋京師妓 王世貞 陳金鳳



早發錢塘江

海門垂匹練。山塢起層雲。白露一江合。紅霞千樹分。片帆移曉色。杯酒滯朝醺。近接嚴陵路。鄉音次第聞。

雨後和梅賓姪原韻

風高蟬迴過林坵。溽暑旋經驟雨收。塵尾話涼無限好。鶴肩吟瘦太多愁。樽前濁酒浮生訣。天外閒雲出世由。想到故園峰似翦。翦刀峯。黃海山名。未知裁就幾分秋。

江

淳字景厚。號健堂。任湖南沅陵縣丞。諫歎籍。生卒皆在江都。年七十一卒。

春日江樓苦雨

結伴來江館。春陰護遠村。踏青空蠟屐。浮白且開樽。薄醉慵攤卷。閒愁深閉門。幾時同曳杖。流覽盡朝昏。

歸雁

二月江南草正肥。橫空征雁苦思歸。回頭尙憶衡陽路。直到榆關影漸微。

暮春

隔江深樹淡煙封。暖入書堂起漸慵。梁上朝飛雙燕子。落花添得墨香濃。

江廷泰

字階平。號益堂。江都人。乾隆壬申舉人。丁丑進士。官湖北竹谿。山西武鄉知縣。署沁州知州。乙巳赴千叟宴。卒年七十三。

遊黃山訪家麗田兄

靈奇表天外。有此神明境。無石不離奇。無松不秀挺。寒光漏夾壁。飛泉落雲影。聳身學猿猱。側足勝蛇蚓。盤空通一線。窅然入簷井。振衣上陽阿。海雲盪胸頂。須臾忽變滅。但覺千峯靜。吾兄脫塵鞅。心空要俱領。撫絃每動操。令我俗慮屏。所願從之遊。煙霞朝夕永。

### 遊山寺納涼

籃輿入古寺。數里竹嬾娟。綠淨啼幽鳥。陰深響亂蟬。簾垂青嶂合。檻隔碧江懸。一榻風能借。清涼得地偏。

江嗣塔

字晉昌。號青渠。江都人。廷泰胞弟。善畫能詩。卒年七十五。

### 高郵三首

覆孟城外水黏天。粉堞參差送畫船。高臥柁樓夕陽落。蓼花三十六湖煙。垂楊如薺草如茵。鏡面平隄不動塵。甃社湖中秋色好。採蓮人是弄珠人。

滿湖明月過秦郵。憑借清光草木秋。一段淮南好風景。畫圖誰復繼文游。李公麟有文游圖。

江文

字銘尚。號竹岡。先歛籍。生長江都。乾隆甲午歲貢。卒年六十七。

### 和林珠浦秋日登文游臺原韻

名邦近接廣陵濤。湖海文人氣自豪。當代論才推八斗。一麾出守夢三刀。下車問俗咨葑菲。入幕多賢聚雁羔。且喜四郊禾黍熟。撫綏應解寸心勞。

仙吏華陽美績聞。三年報最著廉勤。衙齋直傍三清宅。寶籙曾披十寶文。愛聽松濤移午榻。更尋荷露點風雲。珠湖亦有珠林勝。山水名區遞策勳。

咏佛手柑

亭前嗅得木犀香。暑退纔生滿院涼。一覺蒲團禪未了。西來十指拂雲長。

西山林氏詩

江都耿弓填諱

林諱文璉。公字聖與。號得齋。甘泉人。太學生。世系出福建莆田。明天啓間。遷江南鳳陽。繼遷高郵。又以水患

宅。不求仕進。銳意于詩古文詞。尤精史學。好歐陽永叔文。以為警牙佶風。詭奇隱僻。非文家所重。故所為文

安雅和適。詩則汪洋渾灑。取法少陵。能默誦全集。積書十榻。如通鑑十七史。皆手自丹墨。績學之勤。莫與比

也。天性仁厚。好施予。助耕助讀。一鄉賴之。嘗書聯寄季子大田令梅谿公云。留意莫輕疎一點。驚心切聽鼓三

聲。大田公懸之于堂。公卒于乾隆二十六年。年八十四。例封文林郎。所著史略二十卷。閒覽筆記十卷。得齋文

二卷。詩稿四卷。公嘗選錄王維。孟浩然。高適。岑參之詩。為

四家詩鈔。元母林夫人傳之以授元。元幼年學詩。實自此集始。

初度書懷十首。丁酉暢月。予懸弧辰。四十度矣。昔陶宏景年三十六。奉朝請猶云。頭顱可知。矧年過此而學名

之。漫賦十章。聊用自道。

四十頭顱愧祖鞭。飛騰偃息總茫然。少游下澤言非謬。宗慤長風志已遷。荷鍾自甘終老圃。焚香時復對新編。年來碌碌君休笑。博得寒宵穩醉眠。

每吟風木憶高堂。涕泗闌干恨正長。慈母音容難髣髴。嚴親教澤畏淪亡。瞻依永夜悲魂夢。拜獻何年愧

顯揚回首斑衣如昨日。墓田松柏已蒼蒼。

惆悵蓬門日月馳。索居亦自暢襟期。旗亭雪滿沽新釀。茆屋梅開和舊詩。食美衣輕非素志。腸肥腦滿憶兒時。年來斂跡韜光意。只有閒花濁酒知。

卜築荒村遁跡深。自慚與世共浮沈。聲名縱滿時人口。俯仰終非壯歲心。揮塵笑談甘淡漠。閉關風雨絕招尋。天涯知己今何在。芝朮相攜共一岑。

塵世何煩拒太嚴。閒中樂事亦相兼。春山約伴朝驅馬。秋月窺人夜捲簾。酒戶但嫌杯底窄。詞源豈仗筆頭尖。崢嶸空負鬚眉壯。懶對家人課米鹽。

遨遊白下舊交稀。記得聯吟上翠微。絕壁時攀朝露濕。斷峯遙指暮雲歸。三人屐遍棲霞勝。二妙琴亡宿草肥。此日空懷山水意。寂寥誰共撫金徽。余年三十時。曾偕張兩公。李華若。遊金陵棲霞山。今二子俱下世。是用惋惜。

株守伶俜負歲年。懶從習俗啓芳筵。畢生何事期鐘鼎。孤館無心問管絃。幼子未能通典謁。故交珍重贈瑤箋。所嗟樗櫟人應棄。藻飾徒榮祇自憐。

久憑詩筆寄心神。法律儒家自得真。敢與時賢矜藻麗。但收閒景入陶鈞。偏餘氣味同田叟。頗有精神見古人。閉戶獨吟還自笑。暮年誰爲指迷津。

耕耘負郭有田疇。不向朱門作劇緘。種竹栽花容小隱。酒樽詩卷儘消愁。散材書史原相稱。聖代耕桑獨

自謀試問前身何所似。天邊野鶴水邊鷗。  
新詩十首賦平生。玉版烏絲細寫成。持酒最能邀戚友。捫心期不愧神明。住山歲月猶堪數。閱世心情定有評。遙望鏡湖尋夙願。春來定挂一帆輕。

詹讓翁代錄歐文甚工。賦此誌謝。

愧我衰遲似夕陽。多君翰墨重詞場。然脂暝寫松煙潤。弄筆晨書竹露香。楷法于今追季海。文章從古重歐陽。琅函便欲珍雙絕。夜夜虹光護草堂。

秋暮覓得郡城異菊數本。移置齋中。邀同社共賞。

妙選東籬幾種來。綠樽紅蠟共追陪。花常隱逸閒人賞。秋值晴明笑口開。照影最憐涼月瘦。銜杯便覺玉山頹。重陽風景真清遠。坐對寒香日幾回。

林諱廷和

公字致中。號梅谿。得齋公之長子。母王太孺人。高郵大學士王文通公曾孫女也。得齋公績學不仕。靈以所學授公。公幼聰敏。經史百家。靡不綜覽。文律雍和。有鍾呂雅音。詩學唐人。中乾隆癸酉舉人。

官福建大田知縣。慈祥愛民。屢有疑獄。決發無寬。廉潔。好施予。自出仕後。屢產助官用。故家業中落。乾隆二十六年。得齋公卒。公聞訃哀毀致疾。手書行狀始成。未三月。亦卒于闔。年五十五。闔人痛惜之。卒後。靈無餘資。且多貧。樞航海由浙江乍浦歸。廉可知矣。公子五人。長諱開。次名闔。出繼。次諱閩。次諱閩。早卒。女三。長卽元母林夫人。所著有石竺山房詩集四卷。

盆蘭

九畹生芳種。分栽小盞宜。空堦人靜後。書幌月來時。培養經年密。襟懷此日怡。名同王者重。莫任晚風吹。

平樓與家伯叔父小飲

小園三徑草初芟。讌集相邀籍與咸。簾外篆烟猶細袅。樓頭明月已初銜。梅花庭院圍朱檻。楊柳池塘傍碧岳。淑氣漸浮人意煖。酒痕紅欲上春衫。

遊觀音閣口占

閣外垂楊濕曉烟。紛紛遊女盡嬋娟。春衫輕薄春風軟。人在東風二月天。

隣梅

紛紛香雪滿疎柯。欲賞其如隔院何。一種癡情還自笑。好花偏是別家多。

村中望雪

北風吹夢野人家。曉起看山影盡遮。十里平原飛柳絮。五更寒意落梨花。灞橋有客乘孤蹇。剡水何人泛短槎。寂寞荒邨緣底事。漫追玉局賦尖叉。

人日

竹外梅花放一枝。輕霜碧瓦日消遲。草堂有句憑誰寄。簾幕無風祇自垂。勝裏金花爭巧拙。樽中柏葉較醇醪。愧非學士清華筆。也賦靈辰七日詩。

登萬松亭次汪鴻臚韻

華亭聯袂上。峭壁勢崢嶸。雲過石無影。風來松有聲。天邊雙鳥過。眼底萬峰晴。攜取殘霞去。歸途正月明。  
和吳穎長廣文平山堂懷古原韻

春到平山競衆芳。萬峰如笏拱虛堂。檐楹日變風雲色。礪壑時聞松柏香。六代繁華終大業。千秋風雅始歐陽。賢豪筆墨盈碑碣。又見先生賦短章。

初夏閒居次韻

竹影蕭疎壓短檐。一痕綠意上湘簾。銅壺靜驗寅申箭。玉軸閒探甲乙籤。花下論詩師友共。風前把酒弟兄兼。樹陰移過斜陽盡。明月窺人啓鏡奩。

遊冶山

寂寂空山靜。交野鳥呼。峰巔攢劍槩。泉底濺珍珠。山中有劍壘峯。珍珠泉。在十景內。聯袂尋幽境。乘輿過坦途。巉巖當面峙。欲上幾踟蹰。

躋攀登絕頂。勝地問仙踪。一線長江遠。千崖灌木濃。野田開繡錯。石竇隱虬龍。地名老龍巢。騁望饒佳趣。層雲欲盪胸。

峯嶽方窮目。斜陽又欲沈。鐘聲來遠寺。人影出疎林。迴盼千峯矗。遙憐萬壑深。殘雲傍征路。一任短長吟。

余白嶽寄新茶

遙寄新茶仔細緘。月團香氣襲帷幃。午風花落飛三徑。松火烟明繞半簾。晝永睡魔應可破。日長詩思轉能添。一甌霞腳浮輕碧。讀罷南華又黑甜。

和劉易谷前輩花朝集飲竹里韻

卽坡公二月三日點燈會客韻

柳擘鴛鴦二月天。花朝時節百花妍。十千酒滿香盈肆。廿四橋邊月滿船。竹里最宜觴詠事。蘭亭應憶永和年。山窗展誦隨州句。載酒他時欲問元。

春日苦雨

盼到春光與正賒。無端風雨妒芳華。連天綠意迷新柳。滿地紅心葬落花。江上一篙春水漲。樓頭終日濕雲遮。幾回恰被鶯聲喚。著屐來過賣酒家。

較射

塲雲五色寶輪開。象弭雕翎較射來。記得龍堆春雪滿。紛紛獵騎射生回。

丙辰冬送葉裕亭夫子歸里

化雨春風感不忘。臨歧清淚濕衣裳。金燈人去歸舟遠。絳帳情深別緒長。客子篷牕聽夜雨。生徒館舍感嚴霜。吳陵珍重來年約。開到梅花待舉觴。

秋夜對月



殘夜山如影。關心又一年。何期今夜月。仍似舊時圓。桂子三秋夕。蘆花一雁天。冰輪終古在。人事感紛然。

湖中漫成

蒹葭霜冷釣人磯。森森湖干車馬稀。候雁時依汀草歇。浴鳧齊帶浪花飛。侵晨野老浮槎去。薄暮河魚易米歸。一望茅簷眠積水。村村歎息爨烟微。

元宵大雨

金吾玉漏寬今夕。春雨何期妒此宵。燈火六街人寂寂。笙歌何處夜迢迢。團圓兒女芳筵啓。塊壘胸襟濁酒澆。安得濕雲都掃盡。催將明月照星橋。

渡江風雨

暄滿滿耳壯溟雷。擊楫中流勢壯哉。海上黑風吹浪湧。江心白雨捲潮回。城連鐵甕行難到。雲擁金山望不開。默檢生平幸無愧。布帆安穩此中來。

毘陵夜行

一片征帆暮靄凝。夜潮爲報長毘陵。吳程欸乃行須慮。越調哀淒聽最能。須慮。舟名。見杜集。最能。舟子。見越絕書。驛舍過時。嗥野犬。疎林望處見村燈。一痕涼月篷窗底。照見歸家夢未曾。

虎邱

金虎騰精地。繁華自昔聞。笙歌移畫舫。簪珥集紅裙。松影琴臺月。鐘聲古寺雲。劍池南畔路。花落美人墳。  
嘉興夜泊

嚴城逕轉麗譙樓。范蠡湖邊繫客舟。長物祇攜三尺劍。浪遊已過百花洲。破來旅夢聞遙笛。抵得湖風仗  
敵裘。比戶機聲聽夜半。此間景色最宜秋。

與王緜山放舟湖上

湧金門外鏡湖濱。圖畫天然到眼新。十里鶯聲三竺寺。兩堤花柳六橋春。者般山水堪容我。如此樓臺合  
有人。舊雨丁寧留後約。秋風一櫂采芳蕪。

孤山拜林處士墓

處士甘孤隱。潛踪此地來。有亭堪放鶴。無地不栽梅。花影涵湖水。秋陰鎖石臺。停舟修一拜。墓下幾徘徊。  
龍法洞

聯袂窺空洞。森然發冷光。雲風洩虛隧。毛髮慘陰房。剝鑿天工巧。槎牙石肺長。神龍時欲出。霖雨遍遐荒。  
波光寺

逕轉招提側。波光路可尋。修篁應作塢。短策便登岑。雲影移山色。泉聲響樹陰。登樓觀海日。豪氣拓胸襟。  
遊吳山

盤磴上吳磯。蒼茫衆綠圍。石苔頻洗屐。嵐翠欲沾衣。雪隧含陰竊。鼇峯對夕暉。雪隧。鼇峯。皆刺于石。興來登絕頂。足下白雲飛。

伍相廟步高青邱韻

觀甲東門事業空。屬鏤鋒斷霸吳功。鄂王自比前身孝。于相堪同死後忠。萬古潮聲吞落日。千秋怒氣捲長風。我來再拜神祠下。白馬靈旗想象中。

謁方公祠

秋風獨上雨花臺。正學千秋墓道開。剩此一腔埋碧血。可憐十族盡飛灰。江流不湧孤忠去。礪道難隨故主來。太息金川門畔事。鷄鳴十廟劇堪哀。

謁景公祠

正學祠堂德有鄰。丹衷皎皎各成仁。捐生憤効荆軻術。後死全留豫讓身。抉目尙能驚帝子。衣緋先已動星辰。天心亦鑒孤忠苦。吹遍東風草不春。

遊永濟寺

古寺峇嶢俯碧空。憑欄極目望無窮。遊人倚竹衣全綠。老樹經霜葉半紅。六代清涼鐘磬裏。一江烟雨畫圖中。廿年九覽名山勝。僧舊無煩姓字通。

因公出郭。范秀才留坐占春樓二首。

希文愛客今無匹。邀我從容過草堂。偶向高樓資眺覽。每從尊酒話文章。沿溪新綠添春漲。夾道飛嵐冷夕陽。最是關心農事急。風蓑雨笠極相望。

曲檻疏牕四面環。半依城郭半依山。相逢散髮披襟地。只在焚香淪茗間。當砌雨澆花羃歷。掠簷風送鳥。縣蠻俗塵萬斛愁。千斛。到此都教百慮刪。

林諱開。公字玉珂。號霏厓。大田公長子。補博士弟子後。授例爲國學生。公美須髯。顧視清峻。讀書勵節。善吟詠。後。弟諱閩。後。工臨池。久客淮陰。中年爲岱嶽之遊。年四十八卒。所著有霏厓漫草四卷。子慰曾。美儒。鼓曾。出爲季。

### 傍晚舟過富陽

趁得平潮過富春。孤帆柔櫓稱吟身。沙洲雁陣排雲起。荻港漁歌入耳頻。白鳥尙迎前度客。青山如對隔年人。前途又近桐江路。千古高風屬釣綸。

### 暫阻清湖

正苦征程路尙多。行旌何事阻山阿。愁看新月生沙渚。時對輕煙繞翠螺。客裏鶯花宜濁酒。夢中環珮憶銀河。羈人別有無窮感。屈指關津喚奈何。

### 雨中新柳同人分賦

雷塘西去柳千枝。一帶柔荑濕雨絲。春影半簾愁絮燕。東風二月冷黃鸝。長條渺渺情如許。弱態依依倦不支。遙識靈和前殿種。迷離煙景傍龍池。

登赤巖小閣

放眼名區霽色開。倚闌凝望獨徘徊。巖邊鳥掠殘霞去。花外人隨夕照來。峭壁何年懸日月。飛泉幾處走風雷。一樽同醉荷亭北。吸取餘香入酒杯。

畫眉

翩翩毛羽稱閒身。叫遍空山二月春。鎖向金籠伴鸚鵡。畫樓喚起曉粧人。

次六弟桐江寄懷原韻二律

揚關分手上輕舟。正是桐陰一葉秋。我輩東西驚去雁。比來聚散等浮鷗。壯懷枉結三年夢。破帽能禁幾段愁。客邸蕭然無限思。清風明月共勾留。

空對流光憶昔年。頻將血淚灑冰天。庭闈寂寞何堪問。兄弟飄零劇可憐。下榻但從徐稚後。著鞭一任祖生先。秋來屢欲圖歸計。只恐西風馬不前。

次沈學子卽席見贈原韻

鬪罷新詩憶少陵。冰壺瑩澈露華凝。才高早擅無雙譽。學宿應參最上乘。金谷此時傾濁酒。板橋何日伴

漁簪相逢抵掌茱萸節。欲和陽春愧未能。

過程風衣菰蒲曲。舊圃次楊嘯谷韻。

曾見園林萬綠齊。重來悵悵水煙迷。殘碑已沒荒原草。新燕猶尋舊壘泥。此日閒尋偕老圃。當年陳迹指沙隄。多情只有空林鳥。尙繞菰蒲恰恰啼。

秋杪赴胸陽舟次口占。

廿年襟被歷江湖。悵望空天雁影孤。纔趁西風臨古楚。又憑秋水入靈胸。誰家砧杵連宵急。此地雲山到眼殊。最是旅懷禁不得。一帆涼月憶蓴鱸。

歸自胸陽舟中漫興。

紫蟹黃花滿地秋。歸舟欸乃溯中流。舉頭客路千檣湧。屈指官齋十日留。月冷漫嫌雲影薄。霜寒猶見柳陰稠。誰家玉筴飛聲遠。夜半淒清聽不休。

題程吾廬可以園次韻

林亭饒古意。幽賞客來頻。樹色侵檐密。禽聲到耳新。登樓邀素月。倚檻淨紅塵。好景憑誰記。風流憶穎濱。

客中歲寒四首

客邸流光速。驚心強自持。那堪裘敝後。又到歲寒時。凍雀爭簷瓦。冰花結硯池。捲簾一凝望。忽起故園思。

松竹應無恙。其如闊別深。月能臨遠地。雁轉失遙岑。何處霜鐘急。誰家玉笛沈。聽來寒起粟。況復氣蕭森。捲地朔風來。漫天暮景催。冷分冬後雪。孤對臘前梅。未把愁眉展。翻將笑口開。人情相見熱。莫覆掌中杯。襖被相依久。常眠自在身。劇憐燈下影。恐是夢中人。歲晏知通塞。心閒任屈伸。一陽今漸復。好盼眼前春。

舟泊阜河

庾樓此地隔重關。嘯咏如何付等閒。村市半藏衰柳岸。客船孤繫夕陽灣。荒雲歷亂砧初起。倦眼模糊鳥獨還。回首竹西秋有色。丹楓十里到平山。

林諱

公字苑西。號蘭汀。大田公第三子。行五。江都廩貢生。氣岸高邁。才力精敏。大田公官廉多負。蘭汀公與諸兄弟。節館穀所入償之。亦善書工詩。所著有蘭汀詩存三卷。子悅曾。怡曾。業儒。

題涇上朱遠仲參軍斜月杏花屋卷子

淡煙疎雨溼江城。深巷人家燕子聲。他日攜樽重過訪。牧童指處定分明。

題方笠塘無數青山拜草廬册子

當門七十二芙蓉。片片飛來溼翠濃。一夜草廬春雨足。曉天青徧隔江峯。

同阮湘圃姊丈游洋南竈

范公堤上馬初停。極目滄波倦眼醒。遠水雲連陰氣合。殘煙沙盪暮潮腥。古盤低泛千層雪。破竈高懸一縷青。十五年前帆卸後。海天風雨又重經。余壬午年。由五虎門。抵乍浦入口。

題徐補園獨立圖

丈夫不得志，鬱鬱靡所從。矯矯厲貞操，浩氣凌長空。譬彼陟泰嶽，九丸萬壑松。譬彼登龍門，稜稜百尺桐。人生苦形役，愧不草木同。感君獨出意，吾心亦豪雄。

江習隅舟下南沙，偶得風雨泊吳陵之句，同人爭續以詩。

一棹邗江下，篷窗試共憑。煙雲連海甸，風雨泊吳陵。亂響荒城鼓，遙明隔浦燈。最憐今夜客，鄉夢亦何曾。

秋杪晤江習隅於南沙旅舍，以匆匆舟返赤岸，悵然有懷，書此以寄。

才華如此合稱郎，況是文通姓氏香。曠達襟期宜兩晉，縱橫詩格近三唐。水雲南浦花生筆，風雨吳陵錦貯囊。記取潮墩留後約，時約遊洋南未赴煙波萬頃接天光。

河橋分袂最關情，執手翻嫌別太輕。雙槳劃開秋水遠，一帆歸去暮潮生。客中縞紵成知己，海內文章有

弟兄。遙識元方頻問訊，謂令兄玉輩雁行過處悵雲平。

贈白沙薛漁莊

居然大米出門時，書畫堆船放櫂遲。紅樹客吟煙外景，青燈人寄雨中詩。漫來東海招徐穉，謂徐補園未到

寒天訪戴逵，謂戴四堂記得鑾江曾載酒。旗亭都唱玉關詩。

林諱閏，公字歲成，號桐江，大田公第四子，行六，江都廩生，孝弟純謹，工詩，卒于江西，所著有桐江詩草一卷，子報曾，業儒。



韓城旅次

一路青山不記名。匆匆又駐古韓城。客中此地愁行李。列國當年事戰征。深澗俯臨人意怯。高岡直上馬蹄輕。最憐殘月無多影。照我還家第幾程。

步朱若水蘇園雅集元韻八首

聞道名園好。今過畫檻東。迴廊人暗度。曲徑路潛通。桐葉翻新綠。榴花放小紅。只期逢令史。誰料阮生窮。不逢黃叔度。鄙吝幾經春。手捧琳瑯句。心驚筆墨神。敢將窺蠹見。漫作續貂人。但憶高吟處。他時一寄身。結構城闌側。真成君子居。松風吹短袖。竹露滴輕裾。杜牧才何捷。陳蕃榻未虛。公餘尋勝概。長嘯有誰如。幕府消閒晝。攤書傍石牀。疎窗人欲倦。清簟夢偏長。坐擁樓前月。身披閣下涼。香名從可飲。無計共飛觥。三徑饒幽趣。苔痕石上明。捲簾容舞燕。倚樹待啼鶯。小憩情俱適。高談氣轉清。得君同嘯咏。良願慰平生。賓主聯詩社。相看總舊緣。唱酬逢此日。風雅憶當年。揮塵聞長笛。焚香引素弦。蓮花池上客。俊逸讓君賢。名噪江南北。衙齋乍締交。文章精矩矱。詩律細推敲。雅韻春生座。澄懷月挂梢。雲霄非路迴。休便志衡茅。佳辰留好句。雒誦興偏幽。官閣三更夢。江城五月秋。知君原似鶴。愧我不如鷗。願待瞻韓日。蠅鳴次第酬。

寄懷蘭汀仲兄

一封書寄海東頭。萬頃蒼茫感素秋。但使田文能愛客。不教王粲賦登樓。鏡中憔悴清于鶴。客路支離拙

似鳩。惆悵經年成久別。西風日日盼歸舟。  
百里關河每見憐。行行雁足白雲邊。爲慚兄弟如萍梗。多恐功名付水煙。入眼蘆花迷古道。驚心楓葉冷江天。懸知異地懷鄉切。月落烏啼夜未眠。

林

閱字江樓·號秋堂  
甘泉國學生·

寒雁

積雪凋殘萬木蒼。一聲嘹唳出衡陽。衝蘆未飽中田粟。避繳常留半翅霜。夜靜孤飛雲影黑。沙寒斜落月痕黃。上林正待傳書到。牧羝羈臣淚數行。



# 淮海英靈集

閨秀

徐氏

字幼芬。江都人。工部郎中徐葆初女。適孝廉李淦。與季靜嫻夫人。迭有唱和。早卒。王阮亭讀徐幼芬遺詩。兼寄李季子云。自來學得謝光基。博士風流幼婦詞。未免有情看不得。橋南荀令斷腸詩。

春日

日暖春光媚。花香燕子歸。銜泥看未厭。又見蝶雙飛。

宮怨

小苑黃鸝弄巧言。春深碧草暗長門。終朝兀坐愁心亂。怕見旁人繡綵鴛。

張瑛

字玉英。泰州人。張符麟女弟。

午日弔屈原

汨羅千古恨深深。此日靈均何處尋。角黍徒充饑鬼腹。蒲觴不醉怨臣心。洵騰海浪翻風雨。慘怛愁雲變古今。澤畔行吟人不見。離騷讀罷淚沾襟。

中秋

早涼何堪兩事并。縱當好節亦愁生。花經暴雨如相妒。月避寒家不肯盈。肴核自成荒歲景。酒漿猶費老

人情莫嫌此夕無佳讌，尙有饑民乏菜羹。

李素貞 字大素·甘泉朱重慶室·工詩·善楷法·重慶應京  
兆試報罷·太素賦詩促歸·一時都下盛傳其句·

寄抱經主人

北望遙憐鴉穉情，應諾舊約早歸耕。閒拋籬落黃花瘦，枉逐風塵白髮生。玉軫久虛司馬曲，錦機難借樂羊名。緘書不盡高堂意，又怕勞君日計程。

袁蕙倫 字蕙貞·號淑春·通州人·庠生袁洋次女·適  
國子生保成德·善畫·著有揖翠樓詩集行世·

嘗藥吟

既無龐氏鯉，可以佐藜藿。又無唐氏乳，可以忘齒落。憐姑筋力衰，愧我孝養薄。奈何一夕間，舊疾忽然作。夫子行未歸，堂上悲蕭索。含愁不忍言，婉轉嘗湯藥。

寒夜課兒

先春梅萼經霜雪，蓋世勳名自苦辛。兒輩莫言深夜冷，柝行應有未歸人。

冒德娟 字嬌婉·如皋人  
冒無譽之女·

春閨

風動簾櫳春晝長，鶯聲催起整殘粧。獨行亭畔拈花朵，不覺羅衣怯晚涼。

暮春

閒步空階有所思。無端新綠又盈枝。暮春天氣人如醉。喜聽鶯聲未老時。

曉起

曉來初起對窗紗。日上珠簾弄影斜。風動高枝黃鳥囀。聲聲啼向碧桃花。

陳傅姜

泰州人。寶應朱澤況室。賢而早夭。其詩中佳句。如煙月淡相照。竹深人夜歸。亂竹不知路。好山多抱樓。一庭芳草迷行路。萬點桃花送好春。千里關河初過雁。四山風雨獨登樓。皆可述也。

憶母

膝下相依慣。劬勞力已殫。不緣今日別。那識舊時歡。霜落長河冷。心懸兩地難。惟憑諸弟妹。早晚問親安。

中庭

中庭四無人。高梧自清舉。夜半起秋風。蕭蕭葉如雨。

題畫

兩峯峭入雲。數里盤樵徑。深處見幽居。地與人相稱。

登樓

庭樹迎霜葉漸黃。秋風颯颯思茫茫。登樓幾點離人淚。付與雲鴻寄故鄉。

病亟示夫

花方破藥因風落。鳥忽離巢帶葉飛。揮淚向君頻屬付。老親多病幼兒癡。

潘

自謫林外牧子。寶應  
意人。詩人朱宗大室。

過畫川二首

柴門流水尚依然。亭榭荒涼夕照前。猶憶昔年曾放棹。岸花如繡草如煙。  
長橋已斷舊荷池。萬柄荷香只數枝。老樹悲蟬斜日裏。更無人過立多時。

春日口占

帶雨細桃紅更好。如茵芳草綠初齊。池中魚共游行樂。樹裏鶯方自在啼。

步月至壽藤軒作

小齋清坐四無聲。一點秋燈萬古清。我亦行來微諷咏。滿天涼月已三更。

范貞儀

字芳菊。號一柏。如皋貢生高佩蘭繼元配。國學范  
毅女。守節廿三年。乾隆丁巳。旌表。著愁詩集。

春日經理綠雲山房

荒館經時未啓扉。眼前煙景與心違。頻逢風雨花應瘦。久廢刪鋤草漸肥。小閣香泥巢乳燕。短牆蛛網挂  
春暉。伯勞底事東飛去。春盡年年未見歸。

對鏡

匣裏青銅久閉藏。暫時相對轉心傷。飛蓬欲化三秋草。瘦骨真成百鍊鋼。香閣夢回山月冷。玉臺人去鶴書荒。薛媛欲寫丹青寄。天上人間恨渺茫。

重九先夫子小祥

徧插茱萸句忍忘。臨終誦王摩詰句。最傷心。日是重陽。空閨多恨秋先老。遼鶴無音。夢正長。半世淒清同皓月。廿年辛苦歷繁霜。楚詞讀罷招魂句。未見乘風返故鄉。

爲二叔完姻誌喜

江梅花放雅春天。幙綰紅絲繡閣前。合卺香溶銀燭下。思親夢斷彩雲邊。才慚郝氏陪鍾貴。學繼昌黎望叔賢。薄產遺書持護在。好調錦瑟度華年。

寄懷叔姑衡陽夫人

日暖風輕笑語溫。櫻桃花下侍金樽。而今草沒西園路。冷雨斜風只閉門。

春草軒感舊

池塘春水碧盈盈。草亂鶯啼雨乍晴。記得水晶簾影下。攢書曾作女書生。

水繪園故址

蛛網煙絲戶久扃。畫梁檀板黯歌塵。春歸王謝堂前燕。曾記當年舊主人。



悼衡陽夫人

生死因緣讎未除。天涯渺渺獨愁予。夜臺似比衡陽遠。歸鴈來時未見書。

楊恭人

江都人。昭武將軍捷女孫。湖廣鹽驛道憲昭女。適松江王靜庵。年十九卒。其孫顯曾。官給事中。刻其遺詩父書樓稿一卷。

秋日登金山

扶筇浮玉興悠然。一片秋光到眼前。宛轉曲欄圍水面。嵯峨高塔鎮山巔。銀濤瀉海看今日。鐵鎖沈江憶往年。六代茫茫何處是。風流且自話坡仙。

二十四橋

煙花占盡豔陽天。廿四橋名尙昔傳。太息美人香化土。空留明月照仍圓。簫聲已斷西風咽。螢火還依亂草然。無限才華付流水。玉鉤斜處霧寒煙。

雁字

秋色橫空落葉忙。雁排人字到衡陽。橫斜亦似兼三體。宛轉何如學二王。自有白雲堪作紙。不須采筆已成章。想從塞北傳書慣。日習塗鴉一兩行。

琴聲

何處瑤琴弄。飄然三兩聲。游魚浮水聽。大蟹出沙行。颯颯清秋意。寥寥太古情。七絃彈罷後。靜對月華明。

臘梅

黃梅初放藥。晴日映簾櫺。正色何須白。幽香不在紅。種從眞臘至。瓣與蜜脾同。却笑黃山谷。題名意未工。

佛手

朱欒形似葉尖長。金色分來散寶光。千手雷同誰是佛。指頭拈得有眞香。

夜坐

深夜蟾光白。階前露氣清。一天明似水。林外動秋聲。

鴻雁南來急。遙空散月光。新寒多入夜。漠漠桂含香。

王

字端人。江都人。工畫花草。馬相國齊。廷教其女。適李若谷。倡調不輟。著有觀麝草。

荷花行

朝在水。暮在水。不染污泥池水裏。風簾月樹雨初晴。翠袖紅翹堪自喜。採之刺礙吳娃指。返照回船歌緩起。

題破水道人梅花書屋圖

不必買絲繡。沈香日就熏。人疑何水部。我識鄭參軍。卓帽青氈擁。雪窗花洞紛。傳來千載後。姓字重天雲。

繡毬花

花開不亞千團雪。香散眞愁一夜風。簾外月明斜弄影。冰壺倒濯玉玲瓏。

題畫扇

連朝風片雨如絲。正是天涯雁到時。髮几文牕無一事。寫將秋色兩三枝。

雪中懷無慢妹

朔雪狂飈歲暮時。曾無弟妹夜聯詩。如今柳絮因風起。盼煞吟箋雁到遲。

宗母陳氏

江都宗元鼎之母。通書史。墓在宜陵。鎮南夫容墅之左。人稱爲宗母墓。

訓元鼎

昔聞孟母教子三遷。孟也感之。終成大賢。汝今十歲。倏忽童年。少時不學。長何可傳。

王兆淑

字仙苑。通州人。適隱士孫汝寶。有隅社詩集。

山村二首

紅橋溪遍綠。茅屋樹光斜。水定幽潭月。雲藏隱士家。鷓鴣啼冷竹。蝴蝶夢飛花。放眼景何極。閒愁應更賒。暇步舒遙望。嵐光塔影圓。美花分密綠。媚柳裊輕煙。雲物看三變。山林別一天。草蟲聲不斷。鳥語復相連。

曉巡北圃同玉巖外君用白玉蟾韻

鞦韆弄影悄無人。露洗雲痕入杳冥。石色苔明連水綠。花光風熨照山青。

桃花一夜滿溪橋。粉澤脂香浸不消。春被提壺都勸醉。淡紅旭日隔林遙。

寄碧君顧姊并述舊事

塵念一時靜。聞君舊日琴。絃留泉壑意。調訪水仙音。窗紙棲燈影。茶煙裊鶴心。談深不知夜。明月落楓林。

玉

字藍英。江都人。都庠生許松室。忘其氏。著綠窗吟稿。

讀陶淵明傳

斗米羞折腰。棄官如敝屣。素琴不具絃。黃花結知己。把酒酌東籬。蕭然遠塵市。著作祇編年。永和後甲子。昔人品題真。風流同正始。我本巾幗儔。曠達亦自喜。安得似陶公。優遊樂餘齒。

阮籍嘯臺

魏晉時多故。名士罕自存。阮生懷大略。避禍且高騫。一醉六十日。不言絕帝婚。登臺每長嘯。蕩滌胸中煩。人物妙臧否。達觀何足論。快哉遇孫子。勝事傳蘇門。

蜀岡

一岡高聳邗溝束。結體紆徐勢盤曲。曾無片言露嶙峋。地脈蜿蜒達西蜀。山僧滌鉢愛清泉。脫手浮沈到遠天。山脈川源靈秀聚。繁華岡下自年年。十三樓畔開佳宴。廿四橋頭環翠鈿。興亡幾代倏變更。蜀嶺風光萬古情。紅葉樓臺禪智寺。畫船簫鼓綠楊城。我來選勝偶延佇。伴侶一時誰與語。但看今日天氣晴。隔

江山色青如許。

夏夜納涼懷奎鳳兩兒海陵赴試。

薰風習習透疎簾。獨坐中庭夜未眠。不是關山千里月。也成母子一方天。書傳屢代應昌後。賦獻而今克繼先。目盼青雲同得路。菱荷香裏泛歸船。

元旦後二日見新月

隔歲初生月。清輝一線勻。世情還似舊。天運已重新。有影方離晦。如鉤欲釣春。從今輪漸滿。光照畫堂人。

早燕

遙辭海國到柴扉。趁得春風似遠歸。蒼墨依然成對對。將離猶未故飛飛。一簾花氣含新藥。幾點香泥襲舊衣。只恐秋來原似客。畫梁深處羽毛非。

徐德音

字淑則。浙江徐清獻公女孫。適江都許荔生舍人。著有綠淨軒詩鈔五卷。康熙丁亥。其父鑿霞老人。爲之序云。憶昔先清獻公。制府淮南時。吾女德音。生甫數歲。每長者故人至。輒效男子長揖。衣袴亦稱之。一切

環耳釵鈿之屬。弗御也。及過寶傑賦詩。先公呼之侍側。卽能作五七言韻語。而意殊便給。先公絕憐愛之。謂若生男如是。當不誤改金根。惜乎其爲女子也。未幾先公捐館。遂持喪還武林。女年稍長。能略涉軍書。所居在湖山之間。每當煙雲入戶。魚鳥親人。輒復留連景光。率吟小詩以自適。一衣著最久。視之墨漬斑駁。色若古鼎彝。保蠹以他衣進。亦弗易也。江都許太史來菴。故爲先公所得士。有孫曰迎年。儻才也。當先公疾革。鄭重語予曰。異時擇壻。計舍許生無可屬意者。當折輩妻之。及女之歸許也。生猶列博士弟子員。至是益好學。遂得兩闕俱備。能以經術世其家。先是吾鄉林亞清夫人。倡爲蕉園吟社。知吾女能詩。曾以緜素相遺。通殷勤焉。會吾女子歸郭上。亞清亦隨宦洛陽。竟不果相見。閱十餘年。至乙酉之歲。許生擢試舍人。挈女北去。時亞清先在京師。始得握手定交。輒相見恨晚。問以詩卷相質。亞清喜而敘之。且曰。蕉園之社。作者數人。人皆有集。今旣晨

星寥落。幾令韻事銷歇。得子之詩。政復後來居上  
矣。其可不梓之以傳乎。女辭不獲。遂畀剗氏。

### 雨中月

醉月還聽雨。虛堂夜景清。樹分千澗響。雲漏一輪明。縹緲嵐光溼。微茫斗柄橫。誰將摩詰畫。澹墨繪前楹。

### 寓感

未識春從何處回。殘花猶自向人開。池因水涸魚爭去。居爲愁多燕不來。司馬獨遺封禪草。鄴侯真負列仙才。浮雲蒼白原無定。且把松筠手自栽。

### 過吳門

畫橋三百六。見青邱集。春水碧涵空。白舫輕鷗外。紅亭細柳中。鶯花尋茂苑。麋鹿訪吳宮。風景佳無限。閒吟

思不窮。

### 過女真觀

笱輿出城郭。邨居盡桑麻。山中泉作響。山下藤生花。紆回徑百折。仙宮臨水涯。裴回蔭嘉樹。時有春禽譁。女冠出延客。元言亦復佳。房櫺極窈窕。篆香襲碧紗。飽我松花飯。啜我春礪茶。頓使心神曠。愛此土風嘉。髣髴桃源內。尙有秦人家。憩坐只片晷。不知日已斜。清風吹林暮。歸路披雲霞。

### 鳴機怨

織織明月流清光。佳人織素愁空房。迴文杼上機絲急。玉漏聲中秋夜長。夜長晝短愁心積。四壁淒清鳴促織。織成文綺不得衣。豪家用以被廝役。

田家婦

邨中有少婦。蓬鬢不梳掠。人說新嫁娘。已識勤操作。不肯媵豪家。偏甘守寂寞。獨步向田間。持竿驅鳥雀。

熏籠

衾裯夜夜溫。香蘊龍涎好。繡閣自生春。紅顏不肯老。巫峯一夢還。對鏡畫春山。那知簾幙外。風雪正漫漫。

途次口占

荒雞三唱起蕭晨。迢遞關河怯病身。長路相依憐弱女。短書頻寄慰慈親。寒深不耐風驚骨。味苦難教酒入脣。三十功名須努力。爲君碌碌輒紅塵。

亞清夫人以詩集畫梅香椽見惠賦謝

放鶴亭邊積雪時。衝寒花發最相思。幾年鄉夢迷疎影。一幅吳綾見折枝。淨洗鉛華留皓質。獨將墨暈繪清姿。朝來相對成幽賞。漫吮吟毫賦小詩。

玉臺新詠重雞林。一卷攜來百番吟。若欲酬償須白壁。何當持贈比南金。竹西遠憶憐同調。冀北相逢愜素心。從此論文師詰匠。問奇肯許數招尋。

霜後千林金顆圓。感君分餽意。纏絲攜來驛騎。筠籠裏留伴芸窗。細帙前論品定。高盧橘價。誦詩擬效。木瓜篇。素瓷清供。無如爾。徐拂芬芳到几筵。

### 臘月桃花歌

臘雪已霽風淒其。飛塵透我三重帷。朝來鍵戶意殊惡。熏鑪不煖狐裘薄。遙思別墅孤山隈。衝寒應有疎梅開。問關道遠嗟莫致。使我一日腸幾迴。須臾主人自外至。入門告我大奇事。遊驄頃者過慈仁。忽見鱗花盈廟市。此地種花作花窖。水火煦濡花放早。春風不待廿四番。花信全馮人事巧。萬卉千葩接路歧。長紅小白自紛披。楊家信有移春檻。黍谷何須玉律吹。憐余愛花結花瓣。不愁市僧爭高值。百緡爲買一株桃。如購連城雙白壁。幽齋對此喜非常。形影渾忘客異鄉。依然流水花源畔。髣髴東風露井旁。鱗枝低亞渾無數。頃刻春暄變寒沍。還恐朱顏易見衰。頻添絳幕須周護。此時吟賞思逾加。此時樂事極天涯。雖鬢不識真花朵。道是深宮翦綵花。

### 夢歸故園用唐人劉兼韻

夜靜寒風透藥闌。黑甜却喜謁慈顏。紛紛落葉埋幽徑。槭槭枯枝冒小山。斗室雲封梅影瘦。鑑池月冷蕝門關。夢回擁被呼鐙坐。無限鄉愁繞筆端。

### 夫子生辰賦詩爲祝



眉案相莊逾十年。欣逢覽揆擊霞牋。從教詩好如康樂。莫道官貧似鄭虔。咕嚕任嘔書裏蠹。嘯歌欲傲飲中仙。慚無佩玖堪爲壽。手錄南華第一篇。

荔生入直。月夜獨坐作。

朦朧月色映闌干。寂寞虛窗小篆殘。橫笛怕聞添客思。熏籠自倚覺春寒。辛勤載筆趨清禁。嘯詠開尊憶考槃。料得歸來芸閣裏。笑攜好句倩人看。

聽客誦荔生香籤詩

隔窗閒聽詠香籤。花影橫斜月影纖。渾似茶聲驚夢覺。綠華冉冉揭湘簾。

輓雲儀夫人

京洛相逢共論文。登壇真足張吾軍。游揚風雅真慙我。零落人琴又哭君。丹旆飄飄還故國。黃沙黯黯結愁雲。孤山山下尋元宅。萬樹梅花三尺墳。

出都留別亞清林夫人

夫人門高列戟。才儷頌椒。思可鑿空。皆成五色。筆能垂露。不待三秋。蕉社聯吟。屢藻久馳江左。墨莊成集。清詞旋達禁中。而又誼篤壺簪。情深伐木。列國縞紵之雅。比

僑札而何多。寒燈雞黍之盟。繼范張而奚讓。余也。居同梓里。喜接芳鄰。爰在幼穉之年。早切景行之志。猥以作嬖太岳。遂爾辭家。滯迹蕪城。末由謀面。然而催妝之夕。曾承彤管之貽。奠鴈之時。辱惠色絲之句。瓊簫璧月。思之子兮十年。畫舫明湖。望美人兮千里。比者。犬兒紀歲。元鳥司辰。余方隨宦都門。君亦留家燕市。宜南傲屋。經營社燕之巢。巷北停車。密爾棲烏之翼。初通問訊。恍若平生。繼觀數儀。竟成莫逆。基筒酒戲。共晨夕者逾時。廣廈崇旂。奉聲華者濃賦。將謂長親警欬。永奉讜遊。豈期遽賦驪駒。旋嗟間阻。元冥屆節。折哀柳以奚堪。青綺臨岐。撫離觴而不御。爰操柔翰。聊志離悵。深有感於大巫。是用正之結匠。此時

小別。辭於關山雨雪之中。隔歲重來。俟我於禁苑。花之候。盟存息壤。其在斯乎。唱徹陽關。我將行矣。

前身風格是林逋。築室仍依西子湖。班左妍詞才獨妙。郝鍾懿範世應無。掃除鉛粉留真韻。點染溪山入畫圖。却憶當年同里閨。相尋釀似隔蓬壺。

尺素殷勤辱贈將。烏絲句好爲催妝。行間豔奪蒲萄錦。筆底花明翡翠牀。片舸我方之版渚。星軺君亦去河陽。從茲南朔音塵隔。欲寄相思道阻長。

宣南稅宅接芳鄰。忽漫相逢意倍親。紅燭聯吟思雨夜。青尊祓禊憶花晨。情兼聚散襟懷異。誼感存亡涕泗新。余在燕邸。得交黃雲儀。林亞清兩夫人。未幾雲儀祖謝。今又與亞清別。不勝聚散存仁之感。最憶虞翻曩昔語。除君知己更何人。

元冥飛霰歲將終。去住無端任轉蓬。未易相逢輕作別。預思後會儻能同。驚颯眯目邊沙白。衰草黏天獵火紅。長路關山如見憶。詩篇莫惜寄郵筒。

### 沂州書感

長路嗟搖落。崦嵫日半昏。遠山拖雨脚。曲澗浸雲根。忽忽歲云莫。悠悠誰與論。轉愁淮市近。爭悔舊王孫。  
題舊居海棠花下。余自北上後。舊居已爲虞傳外弟。攜家入居。庭際有海棠一本。饒有畫態。今春南旋。偶一過之。正值花時。輒復流連翫賞。有懷靡已。因以折枝攜歸。爲賦是詩志感。

舊居猶記仲春時。日對樓頭芳樹枝。曛日嬌憨醉妃子。臨風笑倚倦西施。十載相憐住幽谷。秋風分袂攜書篋。清姿且作綺羅妝。芸牕忽改黃金屋。今春又復俶裝還。重挹穠芳各破顏。堪歎紅塵徒碌碌。愛渠逸

態自閑閑。低暎綠苔紅。嫋嫋幽情冷韻。誰探討。邨童旋舞。蹋香泥。老媪椎鬢插如草。仙姿原合伴優曇。惆悵低回難負擔。痛汝無言猶值此。況余多恨更何堪。攜向茆齋作佳客。拂几滌器情脈脈。重吟細翫。醉一觴。又見銀蟾照花魄。

渡江弔郭景純墓

江豚隱現吹風浪。扁舟危坐如天上。茫茫六合景空濛。小米丹青恐難狀。須臾擊楫泛中流。砥柱三山疊青嶂。山隅邱隴茂松楸。云是景純埋几杖。遙把醇醪酌一杯。臨風憑弔生惆悵。記得當時典午朝。江左偏安悲草創。黃鬚天子賂金鞭。蠡目將軍開虎帳。危邦當法默以容。清虛何事生悲壯。冀將至理悟奸雄。赤子蒼頭保無恙。泥中曳尾恥偷生。廁上銜刀亦虛妄。八卦思回采石兵。一身拚向金山葬。堪嗟化碧義從容。自是騶螭返蓬閣。清溪千仞白雲居。洪厓子晉頻相訪。猶餘仙蛻大江間。千秋留作狂瀾障。

舟行雜興

四面青山對水窗。山腰瀑布響淙淙。呀啞兩槳中流去。驚起波心鷺一雙。官柳低垂白板扉。打魚人著綠蓑衣。廉纖幾陣黃梅雨。多少歸鴉入翠微。水鄉晴雨總相宜。擘罷吟箋把酒卮。只有一般惆悵事。笈中忘却玉溪詩。隔水人家略徇通。青葙挑菜向籬東。無情芳草綠隄綠。隨意山花繞澗紅。

亭午揚舲杜若汀。雲邊一髮惠山青。愛他年少當壇婦。清婉吳音絕可聽。  
柴門不正恰臨溪。激灑清波與檻齊。燕子飛來低掠水。蜀葵紅映竹簾西。  
冷吟殘醉困騰騰。忘却窮愁詩興增。出岫孤雲無定著。風帆瞬息過蘭陵。  
渺渺煙波客思賒。微風細雨片帆斜。囊罌貯得中冷水。活火教烹陽羨茶。

和逸清先生韻

時清不合隱牆東。詞賦偏能晚歲工。要使中流憑砥柱。豈甘屈曲似屏風。當年抱玉空驚卞。舉世何人爲薦雄。頭白諸生推祭酒。如何只戀釣魚筒。

顧瑞麟字六昭。自署角里畸人。甘泉人。能文章。工繪事。適任生。五年失偶。矢志三十年。自焚詩稿。其父執張存仁。于其父處得未燼數章。刻爲焚餘稿。

秋夜

雨過風初靜。天高雲自流。砌蛩吟午夜。街鼓報三籌。寂寞空樓冷。蹉跎久病秋。何當今夕月。渺渺向人愁。

村居

門掩垂楊野岸東。小橋曲折一蹊通。青山隱隱浮螺黛。流水潺潺浸玉虹。得趣花香鳥語外。會心初日暝煙中。幽居頗與閒相適。榮落何妨付化工。

雨中荷花

空濛細雨暗重湖。翠蓋紅蕖望有無。已辦藕香殘作粉。忍看清淚迸如珠。  
秋宵有感

細雨斜風滿院秋。海棠花老戀枝柔。無情青女還相妒。砌冷苔荒總是愁。

郭

訢字依雲  
江都人

瓶中碧桃

數枝迎面屬知音。謝絕游蜂細雨侵。不向東風怨零落。幽牕片月伴閒吟。

吳

巖字佩芳  
揚州人

立春風雨寄夫子仙石

何事逢佳節。輕寒逼絳紗。風將舒柳葉。雨欲洗梅花。良宴今何在。青燈話舊家。雷江共春酌。曾否念天涯。  
客中書懷次夫子仙石原韻

愁心相對一燈燃。耳畔砧聲起四邊。待月未來聊散步。拋書無那略欹眠。人歸大抵黃花候。客夢先驚白鴈天。楚水吳山空悵望。幾時纔放廣陵船。

憶家大人之姑蘇

依人無奈豈忘家。想見登樓起歎嗟。計到姑蘇應一月。洞庭山上望長沙。

聞鴈

鄉心日日淚空彈。無那秋聲入夜寒。愁絕夢中驚覺後。蕉窗細雨一燈殘。

黃之柔

字靜宜。號玉琴。安徽歙縣人。吳園次之室。園次呼之爲江夏君。著有玉琴齋集。

園居卽事

避俗聊尋勝。山園景物幽。半篙春後水。一笛雨中樓。刻竹驚棲鳥。拋花引戲鷗。還邀諸女伴。更上木蘭舟。

龔鵲紅過訪惠山次韻奉答

簾捲飛花落硯池。掃眉才子坐題詩。兩山煙雨青無限。總是雙蛾半蹙時。

寄暢園同鵲紅作

一道鳴泉繞碧亭。飛花落絮滿漁汀。自從謝女吟成後。不許人間俗耳聽。

吳

吳園次太守之女。舉人江辰六配。所著有香壑集。

村居

涼風吹白雲。野色獨空闊。日夕掩柴關。新蟾吐林末。

曝書

黃梅初歇雨晴時。葉葉芸編趁日移。却笑金閨非七夕。貧來強學郝家兒。

喜得家宜人書

望盡停雲不見家，忽傳錦鯉到窗紗。  
開緘瞥見平安字，不負蘭缸一夜花。

春曉

乳燕一聲春曉天，碧牕如水綠含煙。  
侍兒卷幔催粧早，無數飛花到鏡前。

寄夫子

柳絮輕盈撲翠鈿，春風憶別百花前。  
近來金翦渾閑却，爲報山陰朱百年。

陳

箋高郵人

落梅和韻

風敲簷鐵雨聲殘，更道梅花落畫欄。  
夢冷衡門新竹徑，神傷水部舊詞壇。  
翻飛應與人爭瘦，懊惱難憑笛  
訴寒。縱到飄零豈須怨，冰心留待後來看。

邵

笠字澹菴·泰州人·工吟詠·適生員黃杜若·中更家雜·四壁蕭然·爐香茗椀·靜坐讀書·病中悉焚其稿·故流傳絕少

和夫子貸米詩

莫以貧爲病，吾儕本寂寥。  
餅罌雖久罄，意氣不全消。  
張子仍存舌，陶公肯折腰。  
有隣難貸米，相對慰清宵。

新柳

春雨連朝夕。開軒柳色來。纖腰猶怯舞。青眼未全開。葉葉舒新綠。絲絲挽落梅。未堪持贈遠。詩意好相催。

任

字靜宜。揚州人。適王子莊。詩見十才子驚嘯集。

初春卽事

篆竊湘簾潤。波光抱檻。山雲含雨氣。林鳥變春聲。茗熟琴心古。花香蝶夢清。半窗風動處。松子落棋枰。

雨中登樓遠望

遠野陰霾合。登樓入望賒。冷煙癡夢蝶。細雨醉春花。雲壓山千疊。波翻水一涯。綠楊鶯不語。枝上獨喧鴉。

上巳

近城村墅草如茵。宿雨初收曉色新。青嶂馬嘶迎社客。綠波艇戲祓除人。煙薰麗日鶯啼樹。花落香泥燕舞塵。千古蘭亭傳勝事。風流猶憶永和春。

寄黃夫人

煙昏停繡帙。倚檻憶同盟。知爾香閨裏。春星一樣明。

曉起

香魂正逐煖絲遊。篆竊濃煙擁畫樓。鶯喚曉窗春夢醒。一庭花氣上簾鉤。

胡蝶



海榴枝上獵新紅。羨爾翩翩善御風。曾憶淡雲疎月外。嘯煙看入藥珠宮。

吳 湘 字若耶。江都人。明繪寶鑑云。若耶工詩畫。善撫琴。困于貧。歸參軍范真齋。客寓西湖。有以冷詠。今寓吳門倚老云。

西冷詠

不解嫺刀尺。隨時看好山。檐牙香篆字。湖面翠生斑。靜亦琴中福。勞因詩未刪。古人悲莫見。椎髻望躋攀。

題毛烈婦繡帽

花羅半幅抵千金。持贈猶憐一片心。莫道爾翁親遺纈。白頭悲汝恐難禁。

徐珠淵 字善懷。江都人。為施嶽山側室。年四十卒。施彥恪施氏家風述略續編。庶母徐氏。名珠淵。字善懷。廣陵人。十三歸先君。前一月。有北官過邗。車服甚都。欲納歸。其母將許之。遂泣曰。彼富貴累葉。殆執縛習也。兒何歸乎。兒願得侍文人。為東坡之朝雲足矣。先君聞而憐之。遂聘焉。四年舉一女弟。傷後即不孕。歲已未。先君改官殿講。庶母寄詩。有老夭若解妾心苦。北地風霜盡轉南之句。繼母李宜人。命淳兄奉之入都。又三年。先君疾。兄適略血歸。予亦南還。庶母則焚香籲天。封股和藥以進。且誓于神曰。主翁生平德積于躬。縱必不起。亦延待其子一訣乎。否則以儒林偉人。死妾婦之手。主目不瞑矣。因長號達旦。如是者三晝夜。丙夕。白光如匹練。自屋上落。俄奇香起榻前。先君忽甦。自是始能粥食。癸亥三月二十七日事也。予聞報奔侍。五月初始至。又七十日。先君歿。庶母朝夕哭奠如生。五年猶一日。卒愬鬱以死。遂與先君合葬於螺螄沖。庶母粗能詩。每自焚其稿。死後檢得數首。附見學餘集。小粉楊雜識。讀施愚山先生集。見其孫璫跋。徐孺人封股作羹。療愚山先生疾。事在侍姬。而操志如此。誠為可敬。即讀孺人詩。句語清真。絕無脂粉之態。尤為難得。

寄北

風緊牽離別。燈殘人未眠。此身無羽翼。安得到君邊。  
愚山寄和徐姬珠淵詩。莫怨經年別。天寒耐獨眠。老夫魂欲斷。夢不到君邊。

北寄小鏡

六月扁舟別故山，勞勞旅況幾時閒。傷心不啓匣中鏡，千里依依伴客顏。愚山和姬人珠淵寄小鏡詩。白頭相許伴青山。天意驅人不放閒。寄到

菱花將錦字。斷腸獨自照離顏。

周貞媛

字瑤石。泰州人。遷施干里。著有闕關集。

哭童幽蘭

春風秋雨幾神傷，寥落空閨億曉粧。亦信有才天也妒，可憐無語骨猶香。玉簫聲咽三更淚，銀燭光搖五夜霜。碧落黃泉皆是恨，何須鶴唳斷人腸。

白竝頭蓮

亭亭竝立厭濃粧，枝上新凝六月霜。素質不登青玉案，縞衣常伴白頭郎。比肩如約無私語，對面相憐有異香。謾道予家留別愛，濂溪清淺已成行。

周淑媛

字又洲。泰州人。

元日哭先大人

一夜思親淚，天明又復收。恐傷慈母意，暗向枕邊流。

柏盟鷗

字映潭。著有栢潭詩鈔。韓矩序。稱廣陵園秀。爲沈中垣之甥。善丹青。工絲竹。韓矩。沈中垣。皆不知何處人。

秋夜

畫眉收鏡晚。窗下理吟箋。水漾星搖幕。雲圍月暈天。絮蟲吟夜露。老鶴夢秋煙。樽酒誰家院。嗚嗚奏管絃。  
遊法海寺

淡煙疎柳外。信步到招提。竹院閒眠鶴。蕉陰靜聽棋。破雲飛紫燕。坐樹語黃鸝。鐘鼓經壇響。千山夕照移。  
春日和刘夫人韻

夢回窗下理。縑紉簾捲輝。輝曉日光。燕子輕風芳徑煖。杏花疏雨畫樓香。驚雷野蕨迎階秀。解籜新篁拂檻長。一樹春鶯啼不斷。黏衣蝶粉膩如霜。

題畫

樹擁津亭小。雲迷古寺深。扁舟溪上客。獨立釣湖心。

遣興

雪翻石鼎煮新茶。楊柳風微紫燕斜。蝶夢已回香氣煖。小窗秋水讀南華。

小畫遣興

石榴花片落書牀。蝶掠風絲過短牆。簾滑龍鬚初睡足。自調丹碧寫煙霜。

陳

號爽軒。江都人。工詩善畫。適楚人黃豐園。豐園赴遷入京。爽軒贈詩有云。太平天子文章重。清白家聲夢寐安。年三十卒。著有和鳴集。

採蘭

地僻少四隣。鎮日柴門閉。薤草與栽花。生來頗相契。庭前一株蘭。春風勤樹藝。今朝開幾枝。芳氣襲我袂。眷戀不忍離。割愛冠高髻。

春日攜諸兒玩花嶺雲亭

寂寂香閨春過半。小鬢報道園花燦。何事顰眉坐綠窗。不妨相攜恣遊玩。曉簷更喜放新晴。那怕東風吹鬢亂。大兒憐香繫花鈴。幼女拾紅仔細看。依依笑語且開顏。少焉璧月懸銀漢。蟾娥自是箇中人。清光的籠花畔。

春夜雨窗有感

一夜蕭蕭雨。聽來祇自嗟。雲偷三鼓月。風嫁一園花。白粲今朝盡。青葛何處賒。愁腸無可浣。撥火自烹茶。

冬夜述懷

漏冷風尖月影微。蕭蕭木葉打柴扉。晚煙不斷迷村落。旅雁孤鳴掠釣磯。已剔殘燈翻繡譜。還燒百和襲寒衣。貧家自有清閒趣。料得紅爐煖閣希。

坐月西爽軒同夫子鬯圃

竹影搖窗碎。花光映月明。不知清漏下。祇覺素羅輕。

七夕寄夫子鬯圃

偶然一別又經秋。隔斷銀河水自流。縱使鵲橋真可架。如何渡得許多愁。

倪

福建人。適江都某生。早夫。著有鷓鴣草。序云。內子爲閩中巨族。依其舅氏林公子白門。孟夏歸余。無何一病不起。檢遺稿屬余曰。鑄此以志不朽。夫子之恩。廿日卽百年也。客有善李少君術者。爲余招魂叩生前

事。歷歷如響。復作詩十數章。續于卷末。

偶成

芳心無緒爲誰牽。黛減容消似枉然。已作蘼蕪離恨草。莫看菡萏竝頭蓮。重逢故舊應歸夢。遙憶關山正隔天。時序推移將七夕。銀河相望路緜緜。

楊

江都人。方樸士瓊翠軒詩集。及鄭破水梅花書屋圖題言。皆附其詩。

月夜芭蕉次韻

孤光叢影引。一院綠滋豐。的的生幽色。搖搖動遠空。隔簾秋水似。映几碧天同。不盡舒懷思。蕭條林下風。

邗江七夕

每到秋來詩思多。雙星此夜又經過。只知人世沈情海。不信天工戀愛河。過去韶華毋歎息。當前好景莫蹉跎。閨中笑我何能巧。空向雷塘弔玉娥。

蔣夫人招泛舟。風雨忽至。

北郊槐柳遶林園。曲調陳隋處處喧。花葉一湖飄斷續。隨風隨雨到青楸。

今朝應是洗花妝。好景幽人恰恰當。多少丰姿俱約略。從來不識有鴛鴦。

楊克恭

字德基。江都人。少傳敬莊之孫女。適德清。抑齋徐志巖。諱封宜人。著有陶藻閣詩。

病餘對雪。用蘇公北臺韻。凡五疊。得十首。

一陽初轉力猶纖。滕六司權令肅嚴。松偃正窺披篋客。竹欹渾灑引車鹽。小鬟忍凍敲蠶白。野雀愁饑絮  
畫檐。無奈畏寒常擁袖。焚香暫露指雙尖。  
病懷消遣愧塗鴉。好借清光映五車。搜索枯腸依險韻。迷離老眼炫空花。牕蕉靜對維摩畫。椀茗還憐學  
士家。此際漁翁歸艇子。醉眠蘆絮閣魚叉。  
寶鼎焚香幾縷纖。修持人靜誦華嚴。薄田收息分薪水。冷署牽愁計米鹽。已釀屠蘇催鬪盞。尙遲梅靨莫  
巡檐。年來霜鬢無膏沐。不用呵毫畫黛尖。  
瑤天點破數行鴉。苦憶羈人遠道車。侍女敲冰煎藥汁。雛孫騎竹戲瓊花。煙迷巴峽猿啼影。香冷孤山鶴  
守家。閒裏匆忙緣底事。梅斜竹壓倩扶叉。  
生疎病腕字痕纖。詩律難如戒律嚴。家甕且嘗花露酒。官鱉疑拌水晶鹽。護持綠萼盆供案。收拾紅篙架  
入檐。欲附吟壇慶白戰。閒愁不上兩眉尖。  
鏡裏新更兩鬢鴉。漫嗟歲月轉輪車。如何示寂維摩室。又見飄空天女花。刻曲興闌應返棹。灞橋吟苦未

歸家阿儂蜩縮寒如許。腹稿吟成手懶叉。  
避寒不染俗塵纖。作惡狂飈著意嚴。共慶白頭和水乳。却愁赤足問蠶鹽。牕疎屋老月侵案。雲慘天低冰  
挂檐。欲寄平安書兩字。怪他凍結彩毫尖。  
依棲玉樹噪昏鴉。盼斷江南腹轉車。往事回思如嚼蠟。浮塵不動幸拈花。爐溫活火香留篆。庭積寒輝火  
吠家。自笑綺羅餘習氣。續貂深愧步尖叉。  
身似秋蟬飲啄纖。那堪半月苦寒嚴。無心世事泥沾絮。有意禪機火著鹽。花凍銅餅開蠟蒂。風喧鐵馬過  
冰檐。自憐歷盡艱難境。已陟浮屠到合尖。  
早歲人同覓食鴉。近來嬾拽老牛車。心燈已悟繁華夢。意藥還開冷淡花。袁朮焙參偏廢日。蒲團經卷自  
成家。好憑慧劍刪煩悶。培植靈苗無樹叉。

陳

字懷玉。天長人。儀徵江寧谷昂室。七歲熟毛詩。識擊韻。十歲詩云。惜花有夢疑春雨。愛月多情怕晚雲。當時傳之。雍正戊申卒。年二十二。著有闔房集詩一卷。詞一卷。

春日侍兩大人遊西園

暮春節氣和。鳴禽悅芳樹。良辰侍板輿。駕言西園路。短垣翠微出。曲磴雲根度。維時晨雨收。古藤墜香露。  
妙賞豁心胸。琴書博佳趣。歡宴不知疲。天真暇多遇。

書室新修率題

沈沈庭戶晝無譁。景況居然隱士家。滿院東風飛燕子。一欄春雨卸桃花。吟餘自愛爐香靜。睡起偏宜茗味嘉。安得清閒長領受。不教流水悞年華。

梅

冰香雪韻絕纖塵。萬卉蕭寥獨見新。豈是高情厭桃李。孤標原自不宜春。

春日曉起寄程夫人

柳梢初日影纖纖。紫燕翩翩自出簾。想到綠窗清課早。香傾花露寫楞嚴。

古寺

古寺荒涼野澗濱。粉垣宮瓦尙峻嶒。青松蓋地嘶羸馬。黃葉堆門枕病僧。歲歉人家香火斷。年深碑碣土花凝。蕭蕭落日西風裏。半晌停車感慨興。

秦郵舟中晚眺

曠宇忽然晦。茫茫湖水昏。遠拖涼雨脚。時漏夕陽痕。野艇爭收港。荒城早閉門。依窗凝望久。鄉思黯銷魂。

上方禪智寺

蕭疎古刹掩松關。遺址空傳大業間。四野暮田春草綠。一樓鐘磬夕陽閒。窗中僧定無寒暑。檻外帆多自往還。隱隱山光相望裏。繁華如夢水潺湲。



病中贈桐城閨秀方阿青

鄒鶴先  
生女

門應不慙諸謝風絮尤傳道韞佳。却愧無緣親笑語。捲簾人瘦比黃花。

袁

機 字素文。如皋高振宜之元配。  
浙江簡齊太史枚胞妹。

鏡

我有秦宮鏡。清光欲上天。近看花獨立。遠望月孤懸。菱角何時鑄。盤龍不計年。無人來照影。拋擲井欄邊。

追悼三首

燕去空梁晚。簾虛素月流。輕羅冷團扇。明鏡掩妝樓。有女憐孤稚。無書問遠遊。誰知白楊樹。蕭瑟墓門秋。  
死別今方覺。生存已少緣。結褵過十載。聚首只經年。舊事渾如昨。傷心總問天。蕭蕭風雨際。腸斷落花煙。  
寂寂疎簾裏。飛霜下碧空。殘花啼曉露。病髮落秋風。眸合三生幻。雙飛一夢終。憑棺猶未得。淚書大江東。

輓陶姬

阿兄侍  
者

誰道孤鸞作別離。紅蘭消息彩雲悲。妝空畫閣春歸早。親遠關山信到遲。素紙臨風空望影。燈花何日再  
論詩。知君最是情難割。膝下嬌癡珠玉兒。  
修眉雲髻態憎憎。欲返香魂路莫尋。鍼線頻勞雙手爪。悲歡同說十年心。無家歎我姻緣惡。瘦影憐君春  
恨深。從此綠窗金翠冷。蘭薰粉澤盡銷沈。

有鳳

有鳳荒山老。桐花不復春。死還憐弱女。生已作陳人。燈影三更夢。曇花頃刻身。自傷明鏡裏。日日淚痕新。

隨園雜詩

采蘋亭上煙波暖。需雅軒前竹石清。水榭雲廊三十六。玻璃牕外月先明。  
幾叢水竹瀉清華。終日遊仙總在家。慣趁山中春信早。別開花譜護唐花。  
樹上鶯啼花上歌。水生紋錦月生波。簾垂玳瑁看山遠。座隔芭蕉聽雨多。  
草色青青忽自憐。浮生如夢亦如煙。烏啼月落知多少。只計花開不計年。

袁

字雲扶。一字秋卿。簡齊太史枚之妹。歸儀徵汪楷亭孟暉。著續餘吟一卷。

七夕

遙見微雲海上生。接來一帶鵲橋橫。幾家簾捲鉞樓月。何處人吹玉管笙。傳說女郎今夕會。果然風露此時清。嫦娥似亦憐深意。影照銀河分外明。

小除夕對雪

流光易過往來期。雪影重堆白玉枝。幾處絃歌驚此夜。有人簫鼓憶當時。破牕月射燈花淡。陋屋風來帳影移。一度年華看欲盡。熏爐漸冷漏聲遲。

十二月廿四日立春作

癡雲凝凍雨漫漫。小閣寥寥獨倚看。影逼闌干憐日短。節催草木換春寒。銀瓶水凍栽梅瘦。金剪刀寒刺繡難。不覺東風花信到。琅玕猶喜報平安。

春閨雜詠

年華來去水潺潺。寂寞深閨春晝寒。一樹流鶯千樣囀。夕陽花影在闌干。佳節清明又一年。梨花深苑斷腸天。東風微雨添惆悵。放下湘簾聽杜鵑。溶溶新水漲西池。鳧鳧春風蕩柳絲。梁上營巢雙燕子。斜穿花徑啄香泥。池上垂陰杏子青。一天微露漾疎星。梨花消瘦流鶯老。楊柳風來月滿庭。輕風翦柳絲絲。一徑花飛最上枝。昨夜新雷今夜雨。小闌干外筍參差。薄暮東風散晚晴。繡牕高映一燈清。祇因怕聽鄰家笛。不敢推簾看月明。

清明

十分寒剩一牕煙。作就清明花信前。芳草映階紅杏雨。殘鶯滿苑綠楊天。捲簾新竹調鸚鵡。落日深林叫杜鵑。隔苑遙傳歡笑語。女郎花下戲鞦韆。

早春寄香亭二兄

春滿佳城水解冰。天涯蹤跡逐輕塵。衡陽雁字何曾到。淮海鶯花又見新。細草漸迷江北路。垂楊初放武林春。時逢二月關情甚。雪裏題詩寄遠人。

弔吳姬

幾年零落減精神。譜得驪歌已出塵。柳絮才飛三月雨。梨花忽謝一枝春。新鶯度曲空傳恨。舊燕窺簾不見人。剩有青青三尺土。飄然無處覓前身。

新秋雨夜伴五弟讀書

雨洗新秋夜。孤燈冷畫屏。暗雲籠淡月。深竹隱流螢。鏡影起寒色。書聲耐久聽。共君當此際。身事等浮萍。浙瀝秋風裏。蕭條萬物情。桐飄金井冷。人爽玉壺清。寒柝出深巷。新砧滿禁城。可憐窗下雨。如助讀書聲。

高

槃字初蘭。如皋高氏女。適葉民先生曾孫維楫。

寄嫂氏梅花

三吾往事總堪哀。水繪春風盡劫灰。猶有老梅一株在。強支霜雪近人開。寄將憔悴與君看。人共梅花正一般。只恐深閨還自惜。冰霜姿格有餘寒。

高蘊玉

字冰仙。如皋高椿女。適候選縣丞陳光闡。

杏花

才慚咏絮強拈詩。正是園林杏吐時。縱好莫教出牆去。春光恐有外人知。

夏日

綠陰濃處落紅香。窗透山溪水氣涼。饒有琴書消永晝。工夫餘得繡鴛鴦。

俞廷元

字素蘭。泰州人。乾隆乙酉舉人。俞瑄之女兒。

送蘅臯讓林兩弟遊京師

阿姊閨中數去程。翩翩兄弟又長征。燕臺此去三千里。珍重聞雞破曉行。

哭夫

一閉桐棺倏五年。相依形影總惟前。紛紛血淚啼枯後。只是春深怕杜鵑。

方婉儀

字白蓮。歛之聯璧人。儀徽羅兩峯聘之室也。兩峯以詩畫名於時。白蓮亦能畫梅竹石。熟於史事。每晤姊如輩。陳說古節孝事。規規弗倦。年四十八卒。病時兩峯將遊京師。爲集唐詩送之云。病得清涼減四肢。膏肓終恐誤秦醫。自知死亦人間事。多是秋風搖落時。握手那堪此別離。兩昏輕淚挂帆遲。病中不用君相憶。夜夜孤眠枕獨欹。著有白蓮半格詩一卷。

題許太夫人綠淨軒集

婆娑白髮謝花鈿。慈教爭傳孟母賢。古柏貞松比詩品。一生不作女羅篋。

觀夫子兩峯做唐人墨竹

佛幌輕煙泛古香。清風解籀晚來涼。白尙書句重拈出。一十五竿協律郎。

生日偶作

冰簟疎簾小開明。池邊風景最關情。淤泥不染清清水。我與荷花同日生。

程

字友鶴。別字梅彩。適儀徵汪文琛。乾隆庚寅疾故。文琛輯其詩。爲綠窗遺稿一卷。

鑾江行

鑾江江水差差綠。岸柳江梅間青白。梅殘柳敗雨風中。不管人間春事速。水流花謝兩悠悠。只送青春不送愁。暖漲東風自來去。長年嗚咽繞眞州。

詠梅

冷淡空香雪裏眞。峭寒偏助玉精神。不須更入羅浮夢。一段橫斜自可人。

偶成

何處鄉山是我家。白雲草閣在天涯。一灣流水下孤鷺。幾點遠峯橫落霞。靜裏偏教詩思遠。閑來更覺酒情賒。行吟偶向疎籬外。愛倚西風把菊花。

答芸姊

瀟瀟夜雨響空階。無限離愁撥不開。剔盡昏燈情已倦。清宵轉喜夢頻來。滿腔愁緒倩誰分。心逐高空一片雲。望斷好風吹過去。一行新雁自成羣。

兩地深情隔遠峯。雙魚遙寄水重重。開時莫作尋常看。不盡愁思帶淚封。

和鵬妹雨窗詩韻

綠雨聲中起嫩寒。白蘋花老碧江灘。別來無限相思處。剔盡燈花獨倚欄。

紡織娘

籬豆花閒月。繅車軋軋聲。如何終夜織。不見一絲成。

梁蘭漪

字素涵。一字蓉溪。適汪生。□□早寡。課子讀書。清節自守。親族有憐其貧。議贖金以周之者。堅却不受。族姪汪容夫。以百錢爲壽。作返錢歌還之。著有晚香樓詩稿二卷。國風柏舟之正聲。庶其近之。子端光。

乾隆辛卯舉人。官國子監學正。

乙丑季秋于歸贈夫子

兔絲生有時。于歸喜君子。妾心同皎月。君懷似秋水。關雎樂雅化。衛風無正聲。物滿器必覆。好還天忌盈。家齊後國治。立身良不易。努力惜分陰。莫負青雲器。

送妹于歸廣陵

雙淚燈前落。停杯不忍斟。音書他日思。珍重此時心。失母憐君小。成人慰我深。無違事夫子。莫忘古人箴。

傲居廣陵慰夫子四絕句 錄二

蓬門也有燕相過。回首家山喚奈何。舉世無人憐范叔。青衫依舊淚痕多。

一篇常對午風徐。差勝豪門強曳裾。他日於陵成小隱。辟繡原不廢詩書。

哭夫

嗚呼痛哉。予命不辰。生而多厄。母捐雙息。髮甫披肩。妣喪重慈。齒才及卮。園中弱妹。灑兩淚以同衣。客裏老親。感霜華之滿鬢。乙丑季秋。于歸夫子。雖能舉案。愧無賢女之風。縱不畫眉。實具才人之筆。執

意彩雲易散。遂令比翼分飛。十載深情。一朝永訣。五齡幼女。豈諳緘帶心情。八歲孤兒。未識詩書手澤。持而兼怙。百事萃于一身。賢也加勞。三日恆離二沐。折墨教字。盼分鑿得之光。抱憾啼肌。羞受嗟來之食。恆

茹荼以飲泣。亦閉卷而傷心。從此秋月春花。無非蕩首。

夜燈晨日。總是斷腸。聊復苦吟。用誌悲感云爾。

兩行血淚染啼鵑。一瓣生香總帳前。兒可讀書妾矢志。君應含笑入黃泉。  
心期偕老百年恩。誰料翻爲夢裏魂。有夢不教君到我。呱呱兒女泣黃昏。  
圖書典盡事淒其。百感空懸命一絲。明滅孤燈人不見。黃昏風雨斷腸時。

課女

瓊瑣小兒女。窗前初訓誥。乍囁似鴛鴦。低吟類鸚鵡。摹書筆猶澀。見人羞不語。汝母薄命人。債盡詩書苦。  
四德與三從。殷殷勤教汝。婉順習坤儀。其餘皆不取。

送端兒真州小賦

離鄉今十載。帆影認青山。漫憶予多病。尤憐爾素屏。先人塚壘圯。故舊鬢毛斑。努力承親志。先鞭奪轍還。

哭父

前生應是斷腸人。坎坷窮年志不伸。母喪夫亡悲已極。憑棺又哭白頭親。



易簣猶多未了恩。檢將書史付閨門。先君易簣時。猶以廿一史付予。予非班女慙無學。空抱遺編泣斷魂。

慧業文人原有異。讀書猶似少年時。可憐絕筆前三日。曾共童孫說杜詩。先君粒米不入口者。將半月矣。猶令端兒在旁說詩。

春夜聽隣女度曲

清喉隔院繞梁塵。六拍紅么字字新。曲裏分明悲薄命。天涯飄泊定前因。丁香枝上廉纖雨。豆蔻闌邊黯淡春。百尺粉牆遮不見。料應原是可憐人。

返錢歌贈族子容甫

去年兒失脩脯養。傲屋無方意沮喪。一枝何處可安棲。百里無糧心怏怏。我雖悽愴恥言貧。泌水衡門盡佳況。方楊汪李段俞程。諸君尙義埒古人。釀金助養謀米薪。共言母作東海塵。兒傳諸君言諄諄。我心感激惟書紳。諸君高堂皆有親。脩脯難繼斑衣新。何可分甘到涸鱗。我貧我賤甘沈淪。豬肝不累免顏皴。平生恥食嗟來食。蒙袂貿貿存吾真。聞君又踵諸君至。不惜重敷哀曲事。匍匐敢學於陵陳。槁壤黃泉皆活計。前月多君贈百錢。令兒甘旨供肥鮮。我聞喟然三歎息。生來羞受錢之憐。兒言不可却之堅。却之太甚如矯廉。無可如何加封緘。藏之笥篋心拳拳。秋風起兮雲滿山。遊子思歸覲母顏。淒涼百里無錢渡。方識人間刀布艱。開緘呼兒持前資。返君隆情正其時。助君行色成君孝。我情君義皆相宜。世間奇才不易得。得之難有荊州識。人皆欲殺吾獨憐。中也進修宜努力。進修努力休苦貧。我心君母兩同情。文章有日逢

明眼。專聽春雷第一聲。

九月望日坐月

待月東堂坐轉深。西風聽遍漏沈沈。三更月淡銀蟾影。九月霜寒塞雁心。無數樓臺明夜火。幾家簾幙響疎砧。愁人耐盡秋蕭瑟。獨與哀蛩徹曉吟。

癸巳秋。率兒培女媳。掃夫子墓。

憶昔艱難守志時。麻衣親製鮑家詩。埋煙蝕土君休矣。嚼雪吞氈我受之。百轉酸心擎稚女。雙含血淚看孤兒。可憐心力都拋盡。百尺黃泉知未知。

俞杏貞

金匱人。東川之女弟也。許字高郵州金明經蘭越。三載。明經訃至。卽縞素銜悲以卒。京師士大夫用之以詩。著有杏軒集。

過露筋夫人祠

遺烈傳千古。聞名似讀銘。噬膚空幻相。屹石護貞靈。未見野蓮白。惟傷沙草青。巍祠留砥柱。多少女郎經。

殷氏女

王阮亭池北偶談云。超一子者。廣陵殷氏女。早寡。學道三年。一朝坐化。遺詩偶一卷。

看花

土來澆灌水來栽。顛倒工夫任我來。滿院春風花自語。不將顏色向人開。

王徽。字修徽。號草衣道人。江都人。適太僕寺許譽卿。後爲女冠。住無常地。往來西湖。遊三楚三岳。急人之困。揮灑千金。好金石。收羅古器。然亦隨人散去。性至孝。不沐浴。不奉母食。幼失父。不知葬所。泣涕飯。

命·刺血書經·卒得父骨·死葬西湖·著有遠游篇閒草·期山草·

重過雨花臺望春江

春容靜東岑。雲影結遙燦。坐覺高臺空。不知翠微半。落花自古今。啼鳥變昏旦。撫花良易遷。卽事聊成玩。況乃晴江開。綠波正拍岸。

舟次江滸

一葉浮空無盡頭。寒雲風切水西流。蒹葭月裏村村杼。蟋蟀霜中處處秋。客思夜通千里夢。鐘聲不散五更愁。孤蹤何地堪相託。漠漠荒煙一釣舟。

吳

琪字藥仙·揚州女道士·詩附見范廷瓚竹西詠·

題繡霞堂畫

江樹迷離鷗自浴。江雲飄盡春山綠。渡頭小艇賣魚歸。月映斜扉滿籬竹。讀書樓靜倚闌干。一望煙霞碧落寒。奇嶂插天藏古寺。流泉懸壁露危灘。玉笙聲斷鶯啼處。狼藉落花飛不去。將身欲置畫圖間。相與神仙覓往還。

蔣

葵字冰心·泰州人·生而聰慧·甫識字·卽能解大意·爲詩無師承·輒工·後爲尼·字德日·著有鏡奩十詠等集·

夢醒聞鴈却憶女弟

依稀蓮步夢中來。忽聽孤鴻意自哀。爾爲失羣子憶妹。煩君寄淚到粧臺。

蔣

字玉潔。葵之女弟。後亦爲尼。字德月。

閨怨

限溪西雞齊啼韻。并一至十百千萬兩雙半丈尺字。

十丈深情四遠谿。風光二月六橋西。八千路遠三秋別。百萬愁驚一夜雞。白壁五雙盟尙有。青絲七尺結難齊。半生兩處成孤夢。九折柔腸烏夜啼。

雨夜夢與冰心女兒話舊

孤窗閒臥不勝愁。夢逐嬌癡舊地遊。繡閣牽衣欣聚首。粧臺倚膝倩梳頭。驚魂夜半蕭疎雨。分袂更殘寂寞樓。枕上傷心無數淚。曉來寧忍一舒眸。



# 淮海英靈集

方外

李惠源 字衡山。江都人。黃冠而有詩癖者也。遇人輒言詩。往往取憎焉。于宜陵鎮之東。結菴養母。茅屋三楹。題曰東社。與布衣姜尙遠。沈大修。姜紱。姜紳日吟詠其中。

江月

東溟滂濇阻仙槎。鯨掣冰輪出海涯。星斗光芒搖水國。漁歌悲壯老蘆花。鼉窺夜色鳴荒戍。雁帶秋聲下白沙。一片空明真似鏡。莫生寒暈冷千家。

春日東社新成述懷四首

蕭疎茆屋結溪東。埜鶴營巢辛苦同。陶鑄古今歸筆墨。招邀風月入簾櫳。報書不惜呈蕉葉。醺飲何曾索社翁。翹首故人頻命駕。江南春樹轉空濛。敢向喬林借一枝。天容卑隱亦吾私。桑抽嫩葉蠶孃早。巢壘香泥燕子遲。每向東鄰分杏火。不隨楚客咏江離。年來長物家何有。一甕村醪兩袖詩。修禊年年似會稽。兔毫繭紙自分攜。溪橋宛轉扁舟入。竹樹參差小閣低。坐月合邀江鷺伴。徵歌獨共老鶯啼。撥開香霧醱醺醒。滿院落花青草齊。

太平歲月紀義軒。人坐東風淑氣溫。老去更知書味好。閒來方覺布衣尊。山光著意青依屋。溪水何心綠到門。報荅春暉無一事。年年花下共開樽。

澄

字秋浦。鎮江丹徒人。爲平山堂僧三十餘年。三次迎恩。奉敕題法淨寺額。

招提

寂寞招提境。重重古殿開。殘陽橫翠壁。疎磬出香臺。暝色村邊起。秋聲樹裏來。獨尋松下鶴。無語立蒼苔。

送白齋上人南遊

相別忽相聚。無端又遠行。悲歡同月淡。去住等鷗輕。欲報恩猶在。無言淚欲傾。歸來應有日。且逐雁南征。

成

號貫檀。寶應一宿菴石老人弟子。居儀徵之方山。著有白雲詩草一卷。

方山休夏

我愛茲山靜。炎涼試五年。青蘿生殿角。黃犢老山巔。彌底千絲柳。池中十丈蓮。了然無動轉。趺坐見前賢。

擬隱山居

已了平生願。何須屬後塵。鐘魚嚴梵典。爐鞴肅僧倫。瓢笠仍隨我。煙霞不讓人。息肩知止室。從此一閒身。

出關偈

南詢却十年。萍踪在吳越。已未省師歸。容身得十笏。吾善不足欣。避惡如蛇蠍。道業苦難成。須臾分出沒。

蒲團一夢醒。煩惱始休歇。休歇卽菩提。不隔一毫髮。習靜樂真修。翻經爲寶筏。韶華如電光。歛忽三十月。今夏出禪關。塵勞免謁蹶。世幻等浮鷗。我愚若槽枘。大智仰蒼天。雲閒無礙發。

### 擇菜偈

深栽淺耨幾人知。咬得根香正此時。擇菜須通擇法眼。青留黃去本無私。

明

字倬雲。號紫松。石門人。揚州天寧寺僧。著山房敝帚錄。

### 草堂卽事

柴荆風雪裏。幽事漫相關。細篠青搖雨。寒花白放山。坐深宵欲霽。吟愜意先閒。皓首竟何得。身心冷落閒。

佛

字旭曇。江都人。

### 月夜過雷塘道中

誰唱吳歌古渡頭。一聲清怨過迷樓。淒涼滿地蘆花月。撩亂連天鴻雁秋。寒樹著霜猶是綺。廢塘埋玉尙名句。道人不爲繁華感。露草霜花一段愁。

德

字百泉。通州僧。詩筆清拔。讀史詩以禪理出入。志傳。尤獨出機杼。著有腰雪堂集二卷。

### 讀史

常駿使赤土。不知歸所際。香花奏蠡鼓。珍重金函閉。魚在水上飛。人從天外視。乃知婆羅門。揮斥亦恣肆。



我法若乘筏。我心若操轡。南海極樂邊。再撫沛已至。

往昔瓦官寺。三絕鎮若山。玉像四尺二。五色潤斑斕。獻從師子國。十載淹江關。歷晉及宋世。永永無有患。傷矣齊東昏。毀爲嬖妻顏。四輪載一鉢。八象猶難扳。割截及佛身。胡聽若冥頑。悲憫重廢興。豈以一身慳。所以平等寺。金像涕潺湲。睡天不至天。墮處仍善還。玉釵豔幾時。塵埃同露管。

聖人定大衍。差謬正其微。事後八百年。一行應前期。天台訪算法。國清尋師資。門水舊東流。至若回風吹。稽首受其數。羸縮略不遺。術成跨百代。落下言豈欺。遺鐘人久寂。降榻事焉追。夢想西流水。吾行將安之。白學者誰子。著論曰均善。不免自貶斥。奉聖以壇墀。見賞元嘉中。大被時主眷。遂爾參權要。謨謀得專擅。座上披貂裘。車中障腰扇。宰相稱黑衣。書生慚白面。我教既所擯。姑勿行呵譴。賣論以取官。在聖寧非賤。八萬四千法。了悟歸諸空。當其未□□。由文字窮。大哉鳩摩什。七歲著淵聰。日能誦千偈。隨誦義自通。長安草堂寺。新旨妙發蒙。更出三百卷。深廣暢厥宗。舊經多紕繆。一一商異同。講坐音響敷。聽者皆肅容。傳流得受持。大教所以東。俗僧不解經。提挈憑鼓鐘。願雖廣於天。豈云出家雄。

聽蔣山人彈琴

高士山中來。秋衫帶微露。童子抱琴隨。囊以龜紋布。爲我理冰絃。落指卽成趣。一散未及終。冷然發清悟。古調堪自娛。豈望知音遇。惘惘思子期。俞生亦云固。

山中訪隱者不遇

山上下山山砌足。入雲出雲雲遮目。躡履來尋隱者居。萬疊雲山一茅屋。灑掃不見三尺童。守門獨臥千年鹿。徘徊溪畔無人聲。但聽春流響空谷。

贈鄭韶九

韶九先生年四十。嗜酒文淵傳家癖。夕陽斜映頰微紅。衣拂空濛露猶濕。門前略約流泉鳴。鄰鄰水石灤孤清。不識仙家何處住。雲中髣髴雞犬聲。寂寞古臺冪烟霧。深秋藥草滿山路。招取金童吹笛來。凌風我欲從君去。

題宋顧孝子祠

孝子祠在東郭隅。烟荒雨爛戶無樞。宋季歷元百年餘。明初文皇表其廬。大孝格天事絕殊。母目重光有是夫。嗟余業白別庭除。回首尸囊暮倚閭。

望廬山

楚山秋霽後。突兀望匡廬。瀑布雲開處。香爐雨過初。雙溪纔咫尺。五老在空虛。欲問遠公跡。蒼茫指點餘。

太子磯

太子磯邊路。澄江面面開。雲依檣影動。湖湧月痕來。有磐懸山閣。無人臥石臺。千秋著靈異。吟望一徘徊。

黃山慈光寺

羣峰圍拱妙蓮臺。烏道雲梯十里來。山徑幽隨雲脚轉。寺門高壓樹頭開。遊人蠟屐攀初倦。佛子蒲團定已回。一笑相逢同領會。三生石上不須猜。

文殊院

一菴峰頂上。迤邐踏雲尋。細草烟含碧。修篁石護陰。僧同棲鳥定。客對落霞吟。明月東山上。疎鐘出暮林。

送汪卜三歸淮南

黃色眉端見。知君賦曰歸。幾回縈別緒。無計挽征衣。楚雨片帆下。淮烟一雁飛。何時重纜艇。還款老僧扉。

別孫雪棹

匆匆判袂各天涯。君返龍城我驥沙。料得胡園春尚在。小紅開到米囊花。

洞庭秋月

萬頃烟波動客愁。扁舟載月楚江頭。不知木葉幾時下。却照西風無數秋。清漢一痕涼露湧。白蘋兩畝亂潮浮。素娥自向人閒去。湘浦誰從解佩遊。

德

源字巨潭。泰州人。

癸卯暮春同東谿北垞。泛舟紅橋。

水漿輕擊處處通。一溪柳絮颺春風。酒沾別墅青帘裏。詩在平山翠靄中。野水無情隨眼綠。村花何意戀人紅。橋頭明月依然好。可許清遊到夜終。

行

吉 字遠村·江都人·  
著有遠村詩餘·

對月感懷

一片似愁心。孤懸上碧岑。烟光浮野白。客思入秋深。故渚三更雁。荒溪半夜砧。平生蘆霍志。久矣在東林。

滿

汎 字藥根·江都徐氏子·自少爲僧·好交四方奇士·詩學三唐·其詠菊云·我有霜慈今鶴髮·年年益壽向伊謀·趙侍御青藜極稱之·以爲畫我嗣響·集中若此甚多·尤歷來詩僧所未及也·著有雙樹堂詩鈔五卷·

新秋雨中同程香溪太史黃北垞閔玉井許藕生章葯軒程筠榭書舸諸君過莎圃分韻

商飈吹颯爽。涼雨洗寥廓。不辭泥濘艱。來踐良友約。莎圃結構精。曲折饒邱壑。樹繁深院宇。荷靜閒池閣。幽興殊不孤。好懷斯可託。坐待莫鴉歸。暝色一林薄。

將之焦巖留別邗上諸子用岑嘉州終南山雙峯草堂韻

我本雲水人。交多素心輩。彈琴且賦詩。相與晨夕對。偶欲躡焦巖。長揖別英概。去此不百里。乃在松寮內。繁喧勿我擾。孤寂性所愛。茫茫宇宙寬。浩浩江海大。舒嘯雙峯巔。周覽衆奇會。黃鶴擬可招。青山遠如帶。巍峩不波亭。靈風吹夕靄。高樹隱參差。修篁響細碎。坐傍焦公祠。何異嚴子瀨。諸君倘與遊。扁舟可同載。冬日客白沙。李晴川漁川昆仲。招同陶鏡堂吳非蕭徐荔村寰宗集書齋小飲醉後步月分韻。

冬齋集吟朋。妙論恣情特。而我羈旅懷。磊落興何極。主人好弟昆。愛友鮮難色。剪蔬充文糧。沽酒助吟力。維時天宇寒。高風甚嚴慄。鑪寬活火然。絮薄威寒逼。賴此杯不空。百川堪一吸。舉頭圓月輪。照人孤光寂。乘醉出柴荆。萬籟已潛息。毋辭小步艱。路悄街南北。譙樓更正深。沙雁語偏急。樹杪最宜看。橋頭忘久立。一笑夜歸來。鐘聲出蓮域。

哭父

吾生老父沒。未得覩嚴容。義雁無行次。慈烏失所從。天愁三月雨。鬼哭一聲鐘。荒塚青山下。唯餘風滿松。省家慈。晤二寡姊。話舊感賦。

江邨訪呂涼州

慈母身多弱。終年疾未瘳。晨昏愁易老。兒女淚難收。徒費三遷教。空餘兩鬢秋。不才虛奉養。賴爾慰親憂。茅構臨江屋。尋君野興寬。春風笛四面。幽鳥竹千竿。山好如留客。人閒似去官。殷勤憐稚子。茗椀助清歡。秋郊野步

出郭意何極。郊原緩步通。雲從天際薄。秋向寺門空。蛩語野塘水。鴉棲老樹風。那能盡游興。斜日酒旗紅。馬湘蘭墓和徐荔村韻

一諾千金女。青樓名獨存。雨花歸妙境。風月老荒村。九畹畱詩草。孤碑倚墓門。王生今已沒。誰更爲招魂。

對鏡

手把青銅帶。曉看忽驚顛。頓兩孱顏。鬢眉似我只如此。老大嗟君亦等閒。未必肺肝能盡察。也知形影定相關。但憐骨相寒如水。不許封侯許住山。

渡江省家慈。留別漢秋。

小別無端動客衷。白雲深處去匆匆。因思老母辭良友。欲渡長江趁好風。水鳥時迎春樹外。家山遙指夕陽中。輸他藥運能親養。愧我年來願未同。

喜晴

乍看青天霽色新。模糊雙眼忽精神。雨收亦似痊沈病。日出潭如見故人。巢鳥頓舒難解困。庭花爭放可憐春。安排硯筆當窗牖。細寫烏絲字字勻。

梵

音住通州東門古音淨室。晚年學道花山。乾隆乙酉年沒。

留別

一一橫擔任所之。秋風秋雨定期去。時莫定來時約。山水留人未可知。

明

字大恆。號頁虛。浙江石門人。七歲投楞嚴寺爲僧。嘗侍靈皇帝講禪學。雍正乙卯放還。久住揚州。晚年住杭州淨慈寺。乾隆乙酉。上南巡。賜紫。又題詩云。山光水色一合相。暮鼓晨鐘二六時。試問開茶消盡飯。

孰爲本分孰爲詩。戊子春病沒。錢塘梁山舟太史同書。刊其詩三卷。爲頁虛大師遺集。

宿萬峯精舍

我身如孤雲。去住在空谷。偶來萬峯頭。意倦便一宿。水涼山影沈。樹暝人烟簇。夜靜冷吟蟲。秋聲散叢竹。愛此風味清。得句重燒燭。

送陸南香之廣陵

得得來東湖。秋晴愜幽抱。西風不作寒。勝事縱探討。珠臺繪烟林。詩壇問諸老。况復籬花黃。流連托同好。先生忽言別。重尋竹西道。山堂記曾遊。石磴冷荒草。遙指萬松閒。一榻爲君掃。

雨霽同叢林竹田過桐花吟舍

山寺開晴色。閒行意獨幽。疎桐猶滴雨。殘照最宜秋。小酌人初醉。清吟我亦留。西風涼入夜。暝坐看螢流。晚秋舒雲亭明府招集弄珠樓。

尋幽無事策枯藤。郭外高樓試共登。樹遠殘陽看歷歷。塔寒秋水漾層層。詩參摩詰清誰敵。畫到雲林瘦未能。月黑扁舟歸亦好。蘆根幾處颺魚燈。

廣陵重遊馬嶰谷行菴

香茅一把屋三椽。彈指聲中憶舊緣。隔院疎林猶著雨。到門修竹欲生烟。秋光却趁重來納。詩案仍參未了禪。際此蕭辰莫孤負。不妨遲上渡江船。

秋曉過燕子磯

露重兼葭月落遲。風微波靜放舟時。篙師報道前山好。六扇篷窗盡入詩。  
江聲斷處曉烟平。宿鳥雙飛拍水輕。燕子磯邊黃葉亂。我來恰恰喜秋晴。  
寺寺禪扃閉向山。赤闌干外白雲閒。西風忽地船頭落。一杵鐘聲渡水灣。  
一峯相送數峯迎。眼界空來分外明。遙指烟波有無際。秋陰低壓石頭城。

晚渡揚子江

揚帆却趁晚風侵。歸渡尤憐秋景深。紅樹幾堆然日脚。烏鴉千點落江心。  
烟昏鐵甕城疑遠。波撼金山寺欲沈。到岸船頭一回望。塔燈明滅在空林。

獨登紅橋四首

清遊攜得杖頭錢。自向紅橋自買船。禩事直教秋作主。笑無麗句鬪春妍。  
破車雲淨午風清。水蓼花繁繞岸明。撐到柳絲鄉外好。菰蘆半折弄秋聲。  
桺檀香塔白于雲。橋跨蓮花世界分。無數樓臺金碧動。欲呼大小李將軍。  
行盡青青松萬株。莓苔淨處便跣趺。風流歐九從誰問。堂外平山色未殊。  
重過如臯范思堂招集虛白齋



瓢笠翛然雲水寬。重尋遊跡憶荒寒。木樨香散人初到。桐葉陰疎秋未殘。脫手新詩傳口易。交情舊雨許心難。十年彈指渾疑夢。世事何須白眼觀。

將還西湖同人作秋風黃葉歌贈行率賦留別。

讀罷秋風黃葉歌。離情歸思更如何。擬從白社參詩住。無那青山入夢多。九日霜花憐去客。一船江月盪寒波。故人他日親相問。應聽清鐘起薜蘿。

阻凍清江觀寄舟。畫蘭有感。用壁閒楊孝夫韻。

一花兼一葉。想見故人心。淮北空留跡。江南負賞音。牢騷秋月落。寂寞谷雲深。讀罷雪燈下。香風寒入林。

題春江烟靄圖

天宇清明日正遲。東風蘊藉颺遊絲。春痕上樹綠無次。曉雨著花紅欲移。垂釣石溫頻待月。煮茶聲細獨尋詩。上林烟景渾如繡。莫漫句留五畝池。

壬午十一月六日。平山主人。招同諸公集平遠樓寫望。

我來歲云暮。尋勝興頗餘。三日兩擊舟。游事乃徐徐。延綠水廊靜。到處烟林疎。平鋪小畧舸。一帶青篳簹。霜鐘出渚口。導我經窮廬。風寒萬松杪。大好雲歸初。隔江十八峯。隱隱搖窗虛。斜陽抹平遠。衆壑淡有無。觀妙殊有得。此景畫不如。量茶同謙老。拈韻追歐蘇。流連不忍去。燈火明村墟。

復顯字夢因·別號雪廬·浙江海寧人·張氏子能詩·兼善雲林山水·主揚州龍隱寺·有雪廬詩草四卷·船山蔣太史士銓序之·

### 登金山

一葉乘風破浪開。登山更上妙高臺。亂雲時復生虛壁。疑有蒼龍聽法來。

### 秋夜聞雨

暗蟲繞壁怨殘更。燈影幢幢半不明。秋雨自涼人自臥。蕭蕭一夜打窗聲。

### 送牛二亭處士之泰安同蔣清容金棕亭閔鹿亭張堯峯

期君據別緒。雨過途猶濶。野蔬供晚餐。高詠和清磬。天意亦憐人。夕霽明花徑。齊魯多佳山。空作夢遊到。今君適東魯。春風爲前導。安得拂袖行。秦岱同高蹈。芳樹盡著花。綠莎漸映階。君去淮水北。素心誰與偕。惟有清霄月。皎皎照我懷。

如震字慧安·號禹門·高郵人·著桐花館集四卷·

### 京口曉發

昨來如孤雲。此別似飛鷺。殘雪潤州山。歸人廣陵渡。多謝管鮑交。今非磐石固。且真伐木詩。去作閒居賦。

### 贈小顛

若箇聲華好。顛如湖隱同。濟顧僧號名傳半天下。身老萬峯中。鬢爲謀詩白。顏因得酒紅。柴門相送處。新月

破籬東。

寓齋書事

已厭蕭條境。翻思去未能。蟲聲荒砌月。僧語破樓燈。得句留何必。懷人畫亦曾。客亭橋上粉。剝落幾多層。

送胡漱泉之蘇州

洞庭霜樹橘。虎阜酒家旗。憶我曾遊處。而今隔幾時。聽鐘山寺遠。待月水樓遲。若到寒泉館。殷勤爲寄詩。

贈郭來澄

時年百二  
十三歲。

仙翁高臥樂清虛。百二春秋尙有餘。曾共白猿論劍術。還從黃石授丹書。谿邊藥採雲深處。洞口琴張月上初。我亦乘閒時過訪。碧沙瑤草到山居。

虎邱後山

虎邱山後蕭條地。楊柳叢霞共一川。日暮雨來人不到。鷺鷥飛上釣魚船。

超

字衍燈。通州人。有詩集。  
又有烟波閣江梅詩一卷。

馬鞍山過寒巖大師

攜筇獨入翠微閒。老樹青山媿此顏。倚檻靜看花落去。聽泉常趁月明還。鶴歸峯頂松濤寂。磬出孤雲石洞閒。欲訪遠公成夜宿。寂寥清夢繞禪關。

性仁 字慈恒。海寧陳相國之族孫也。爲夢因弟子。建隆寺。

松亭葯根兩上人。小集桐柏軒。用孟襄陽遊景空寺韻。

犬吠秋陰夕。細聽人扣關。雨驅殘暑去。秋放小庭閒。詩思碧梧外。客懷紅蓼閒。荒廚有烟火。煮茗話空山。

建隆寺

綠楊城北樹千章。寂歷深藏古上方。星斗尙遺臺畔石。竹梧新構水邊房。詩題薜壁僧同瘦。楊榜蓮池夢亦香。幾日句留秋滿地。蕭蕭落葉下西廊。

過桃花菴

隔林鳥語正綿蠻。落盡桃花客到關。楊柳濃邊移畫舫。樓臺闕處見青山。漏聽蓮葉琴初罷。茶熟松風鶴未還。來向石頭尋畫本。豈知身在畫圖閒。菴僧石莊。善丹青。自號石頭和尚。

